


ANG GAHUM SA DIOS

SA PAG-USAB

 Salamat, igsoon. [Nagaingon si Igsoong lalaking Carl Williams, “Usa ka pribilihiyo gayud nga nagaanhi si Igsoong Branham kanunay sa Phoenix. Sa akong pagtoo mas kanunay siyang nagaanhi diri sa Phoenix kaysa ubang lugar. Ug gusto pud nato nga moanhi siya pirmi, sa unsa mang paagi, basta nga ania pa ko dinhi. Ang Dios magapanalangin kanimo, Igsoong Branham.”—Ed.] Salamat—salamat, Igsoong lalaking Williams.

Maayong buntag, mga higala. Ako . . . Kining sa pamilyang Shakarian, Si Igsoong lalaking Williams ug si Igsoong babayeng Williams ug daghan kanila dinhi nahibalo na niini. Nakita ko kana sa usa ka panan-awon, mga duha ngadto sa tulo ka tuig sa wala pa siya nasakit, ug nahitabo kini.

² Ug sa miaging tuig kaniadtong ania kami dinhi, nagtoo ko nga niadtong Enero kadto, didto sa konbensiyon, mao kadtong panahon nga kadtong pari (Unsay iyang ngalan? Nalimtan ko lang ang iyang ngalan.) anaa dinhi. [Adunay nagaingon, “Stanley.”—Ed.] Stanley, Bishop Stanley, gikan sa simbahang Katoliko. Nahinumdom mo niadtong gidala niya kanako ang Biblia, kabalo mo, ug gisultihan ko niya . . .

Daghan kadtong nagpropesiya, “Anak kong babaye, naayo ka na.”

³ Ug siya nahibalo nga ang maong panan-awon nagsulti nga siya dili gyud mamaayo. “Mamatay siya tali sa alas dos ug alas tres sa kaadlawon.” Nadumduman n’yo ba kadto? [Adunay nagaingon, “Oo.”—Ed.] Busa, alas dos o alas tres.

⁴ Ug dili nako kini masulti kang Demos. Pero gisultihan nako ang iyang inaina, didto mismo sa lawak, tabok mismo niining dapita. Miingon ko, “Dili na gyud siya mamaayo.”

Si Mrs. Shakarian miingon, “Bueno, ang tanan nagpropesiya na man.”

⁵ Miingon ko, “Siyempre, puede man kong masayup, mismo, apan gisulti ko na kini. Dili na siya mamaayo.”

⁶ Daghan kanila ang gisultihan ko, mga tulo na ka tuig ang milabay, “Nakita nako siya nga naningkamot nga mabuhi, ug nakahigda na lang siya. Ug gipataas niya ang iyang mga kamot ug mituaw siya kanako, nga sama niana. Ug ako—dili man lang nako siya maadtoan. Ug dayon nakita nako siya nga namatay. Ug pagtan-aw nako, dunay usa ka butang, usa kadto ka orasan,

ug ang oras nga makita nako niadto kay tali sa alas dos ug alas tres.”

7 Ug ang obispo miingon, “Bueno, tan-awon lang nako kung sa unsang paagi kini mahitabo.” Busa, nahitabo mismo kadto.

8 Nasubo gyud mi. Mabati ko nga nawad-an gyud ang iglesia og usa ka labing maayo nga tawo, diha kang Igsoong babayeng Florence Shakarian. Tungod kay, siya usa ka maayo gayud nga mag-aawit, usa siya ka babaye nga puno sa Espiritu.

9 Nakauban nako kaniadto ang iyang inahan; ang iyang inahan mao ang usa sa mga una nakong kontak sa West Coast, kaniadtong giayo ang iyang inahan. Sa dihang ang mga doktor . . . Na-coma siya kaniadto, ug nanghupong na. Ug mao nga ang—ang doktor nga atua didto misulti kanako, miingon, “Karon hilum ka lang kung mag-ampo ka. Ayaw lang kaayo pag-saba. Kay himalatyon na kanang babaye.”

Mitubag ko, “Oo, sir.”

10 Ug miingon siya, dayon, pirme gyud niya akong ginaingnan. Ug, bueno, wala man lang ko’y kahigayonan nga mabuka ang akong baba, mora’g ingon niana.

11 Bueno, si Igsoong lalaking Demos man kadto nagsugo kanako nga adtoon ug bisitahon ang iyang asawa.

12 Busa, misaka ko sa taas. Ug nakita ko si Florence nga nagluhod didto sa salog, nga usa siya ka matahum nga batan-ong babaye, ug kauban ang pipila pa ka mga babaye didto. Miduol ko ug nag-ampo alang kaniya, ug gisulti kadto. Ug wala siya’y panimuot niadtong higayona. Ug gisulti sa iya nga makabangon ra siya pag-usab. Ug nakabangon gyud siya. Pipila ka tuig pud human niadto ang milabay, namatay siya. Ug karon nagatubag gayud ang Dios sa atong mga pag-ampo.

13 Ug nahibalo kita niana, nagatoo kita nga ania kitang tanan karon tungod sa kabubut-on sa Dios, ug kita mobiya sa samang paagi. Ang tagsa-tagsa, ang matag usa kanato moagi gayud nianang pultahan. Ug mao kana ang hinungdan nga ania kita karong buntaga, nga nagkatigum sa niining Christian Business Men’s Fellowship, aron pagahistogan kining mga butanga, ug mag-andam alang niana, kay nahibalo man kita nga siguradong moabot ang mga niini.

14 Karon usa pa ka batan-ong babaye si Igsoong babayeng Florence, kwarentay dos anyos lang, gisultihan ko ni Igsoong lalaking Williams bag-ohay pa lang, ug bata pa kaayo. Apan sa wala pa sila . . . nahibaloan na niya daan nga siya adunay ingon niana nga sakit, hinoon, nakakita ako’g usa ka panan-awon mahitungod kaniya, ug gisultihan ako kung unsay mahitabo kaniya. Busa, mahitabo gyud kana . . . Ang Dios nasayod na sa tanan mahitungod niini, ug nakita niya si Jesus sa lawak sa wala pa siya mibiya. Dili na kita gustong mag-ampo pa alang kaniya,

tungod kay kadaghan na nga gihimo nato kana. Ato na lamang pasalamatang ang Dios sa usa ka kinabuhi nga nakauban nato, nga nakapadasig kanatong tanan, sama kang Igsoong babayeng Shakarian.

¹⁵ Ug gusto natong iampo si Igsoong lalaking Demos, og si Igsoong babayeng Rose. Ug dili nato kalimtan, nga miabot ang grabeng kalisud sa ilang kinabuhi, sa nanglabay nga . . . kaniadto ang iyang amahan, ug karon iya na usab igsoong babayeng . . . niini lang nanglabay nga mga tuig. [Adunay nagapakigsulti kang Igsoong Branham—Ed.] Apan, ug, oo, wala pa’y . . . wala pa’y, napulo ka bulan; ug si Igsoong—Igsoong babayeng Edna, pud diay.

¹⁶ Busa, kabalo ko kung unsaon pagduyog kang Igsoong lalaking Demos sa iyang gibati. Aduna ko’y amahan, igsoong lalaki, asawa, ug gamay’ng bata, nga sunodsunod mitaliwan sulod lang sa pipila ka adlaw, maong ako—nasayod gyud ko sa iyang gibati karong buntaga. Mabati ra nimo kana pag-anaa ka na sa ilang kahintang, diha ra gyud nimo mahibaloan kung unsaon pagduyog sa ilang mga gibati. Ug . . .

¹⁷ [Ang PA system mipiliik—Ed.] Ako ang hinungdan niana. Pasayloa ko. Naay natuplokan sa akong kamot, dinhi og gamay’ng pindotanan. Busa ako—pasayloa ko nga napakusog ko kaayo kini, ug wala nako tuyoa.

¹⁸ Busa manindog kita karon samtang kita . . . kung mahimo ninyo, kung kini . . . Iduko nato ang atong ulo.

¹⁹ Langitnong Amahan, nagatigum kami dinhi karong buntaga aron sa pagsimba Kanim, ug aron maghatag Kanim og pagpasalamat ug pagdayeg, sa pagpadala kang Jesus nga among Manunubos, nga kami adunay paglaum human nga matapos kining kinabuhi, ingon nga nasayod kami nga kanunay wala gyu’y kasiguradohan ang among pagkinabuhi dinhi. Ug, Amahan, ang makita ang alaut nga mga kahintang nga masinati niining lawasa, malipayon kami nga dili kami kinahanglan magpabilin dinhi sa tanang panahon. Naghatag Ka og pamaagi aron makalingkawas, pinaagi nianang walog sa kamatayon.

²⁰ Ug, Amahan, mapasalamaton kami Kanim karong buntaga, tungod sa usa ka kinabuhi nga mibarug uban kanamo, wala pa’y usa ka tuig ang milabay, nga nagaawit sa mga pagdayeg Kanim, si Igsoong babayeng Florence Shakarian, sama sa among pagkaila kaniya. Ug dugay Mo na kaming gisultihan sa wala pa, mga pipila ka tuig na ang milabay, nga mahitabo gyud kini, aron nga dili kini makapakurat kaayo kanamo. Ug nasayod kami nga tinuod gayud ang Imong ginasulti. Ug ang Imong Pulong nagsulti pud, “Ang tawo nga natawo sa usa ka babaye, hamubo ra sa panuigon ug tugob sa kasamok.” Nasayod kami nga tinuod kana, usab, Ginoo. Nasayod kami nga kaming tanan moagi gayud nianang walog. Busa nagapasalamat kami Kanim

sa iyang kinabuhi nga mianhi ibabaw sa yuta. Ug nagasalig pinaagi sa pagtoo, nga karon, karong buntaga, siya nakaikyas na niining maalaut nga balay nga puno og kagaw, ngadto sa usa ka mahimayaong lawas nga dili na gayud masakit. Ug ang iyang talento sa pag-awit, ug ang iyang tingog, ug ang iyang espiritu nga madagayaon sa grasya diha kang Cristo! Bisan kung siya makabalik man ugaling karong buntaga, dili gayud niya kini buhaton sa unsa mang paagi; tungod kay masinati na pud niya kining tanan. Nga, karon natapos na kini, kauban na niya ang iyang inahan ug ang iyang amahan. Gipapauli na nila ang ilang anak. Busa, kami—nagapasalamat kami Kanimo.

²¹ Nagaampo usab kami alang sa kahupayan, sa among Igsoong lalaking Shakarian, nga among minahal nga igsoon, nga nahibaloan ang—ang kinabuhi nga iyang gikinabuhi, ug ang mga pag-antus nga iyang naagian sa miaging mga adlaw, ug kung unsa na ang iyang kahintang; makita namo siya nga nagkaedad na, ug ang iyang mga buhok nangaupaw na, ug nagatikubo na ang iyang mga abaga, ug bisan pa niana nagapabilin gihapon siya sa pagpang-misyon alang sa Dios. Dios, hatagi siya og kusog karon. Nagaampo kami, Dios, nga Imong itugot kini. Alang sa tanan nga nagbangutan tungod sa iyang pagpanaw, kami nagaampo alang sa matag usa.

²² Ug tugoti kami, Ginoo, samtang nagapamalandong kami niini, mahinumduman namo nga kami mopanaw usab sa umalabot nga adlaw. Samtang nagalingkod kami dinhi sa Presensya ni Ginoong Jesus, kami nagahangyo nga Imong dad-on kini nga lab-as sa among panumduman. Ug tugoti kami nga magmasusi, ingon kung unsa kini, o mag-imbentaryo sa amo mismong mga kinabuhi, nga kami mapailalum sa Dugo ug anaa sa Pagtoo. Itugot kini, Ginoo.

²³ Karon sa akong pagpaninguha nga mahatud kining gamay'ng mensahe ngadto sa mga tao luyo niining mga kahintang, karong adlaw, nagaampo ako nga tabangan Mo ako, Ginoo. Lig-ona ako, kay ako—ako—kinahanglan ko kini, Ginoo. Ug nagaampo ako nga Imong itugot kini. Ug hinaut nga aduna ko'y maipamulong nga makapasidungog Kanimo. Ug kung aduna ma'y nakadungog sa among tingog karong buntaga, nga dili pa andam nga atubangon ang takna nga anaa sa unahan kanila, hinaut nga kini na ang panahon nga sila motugyan ngadto Kaniya Nga nag-ingon, "Ako ang Dalan, ang Kinabuhi, ang Kamatuoran," nga mao ang among Ginoong Jesus Cristo. Kay among ginapangamuyo kini sa Iyang Ngalan. Amen. (Makapanglingkod na kamo.)

²⁴ [Adunay nagapakig-estorya kang Igsoong Branham sa entablado—Ed.] Gustong mahibaloan sa igsoon dinhi kung klaro nga nakadungog ang tanan. Naa siya'y duha ka mike nga nagaandar. Okey lang ba kana? Madungog ba ninyo? Ipataas

ang inyong mga kamot kung madungog n'yo. Madungog n'yo ba? Ipataas ang inyong mga kamot. Sige.

²⁵ Pasayloa ko nga wala kami'y lingkuranan para sa tanan karong buntaga. Ug nagasalig kita nga dili ako magdugay dinhi, igo lang tingali nga mahatud kanato ang pagbasa sa Pulong; nga mapasidunggan sa Ginoong Dios ang Iyang Pulong nga gibasa, ug ihatag kanato ang Iyang grasya, aron maalagaran nato Siya pinaagi niini.

²⁶ Karon gisultihan ko ni Billy Paul, karong buntaga, nga basin mamulong kami sa sunod Domingo didto sa Grantway Assembly of God, sa Tucson. Kung aduna dinhi nga gikan pa sa Tucson, tingali'g dili ka nako mahimamat karong semanaha. Didto ako sa Grantway Assembly of God, sa sunod Domingo.

²⁷ Mao pa'y pagbalik namo karon gikan sa Sidlakan, ug medyo luya pa ako og gamay, tungod kay nagpasulabi ko'g kaon, tungod sa pagkabuutan sa mga tawo didto sa bukid. Ug—ug nasakit ko, mao nga dili maayo ang akong gibati karong semanaha. Busa, iampo ninyo ako. Ug. . .

²⁸ [Adunay nagaingon, “Nasobrahan sa opossum.”—Ed.] Unsay imong giingon? [“Nasobrahan sa opossum.”] Si Igsoong lalaking Carl Williams sa iyang hilig magpatawa, ug nagtoo ko nga kinahanglan nato kini karon, ingon niya, “Nasobrahan kono og opossum.” Wala ko nahibalo niana, Igsoong lalaking Carl, basin nasobrahan hinoon og squirrel.

²⁹ Kung gusto n'yong mag-ampo alang sa usa ka tawo karong buntaga, aba, ako—pasalamat ko gayud kung alang kanako ang uban ninyong mga pag-ampo, tungod kay—nagakinahanglan ko niini.

Bueno gusto natong modangat dayon diha sa Pulong.

³⁰ Ug dili ko gustong dugayon pa kamo dinhi, tungod kay nagatoo ko nga adunay kadtong mga nakakonekta sa telepono sa tibuok nasud, niining buntaga, gikan sa West Coast ngadto sa East Coast, gikan sa Amihanan ug Habagatan. Daghan, daghang mga kongregasyon ang aduna niining mga himan nga aduna kamo dinhi sa tabernakulo. Nakakonekta pud kini dinhi sa Phoenix, nga bisan asa ipahigayon ang panerbisyo, madungog gihapon kini dinhi sa. . . Ug nanagtigum sila sa mga kasibahanan ug mga balay, ug mga ingon niana, pinaagi sa usa ka signal nga maayo ang kalidad. Ngani ingon nila nga mas maayo pa kono kini kay sa pagsibya. Kini mao ang pagkonekta sa telepono, nagabutang sila'g usa ka receiver o mikropono, o unsa man kini, diha sa lawak. Ug sila. . . Ingon sa akong asawa, pag-abot niya gikan sa Indiana niadtong miaging semana, dinhi sa Tucson, parehas ra kono kini nga daw sa anaa ka mismo sulod sa lawak. Busa nagaampo kita nga panalanginan sa Dios ang tanan nga nagapaminaw pinaagi sa pagkonektar sa linya karong

buntaga, asa man sila. Didto sa New York, oh, hapon na karon didto, ug lainlaing oras karon sa ubang dapit sa tibuok nasud.

³¹ Karon diha sa Basahon sa Mga Taga-Roma, sa ika-12 nga kapitulo, ug sa ika-1 ug ika-2 nga mga bersekulo, buut natong—buut natong basahon kining maong Kasulatan.

Busa, mga igsoon, ginapangamuyo ko kaninyo pinaagi sa mga kalooy sa Dios, nga ihalad ninyo ang inyong mga lawas ingon nga halad nga buhi, balaan, ug nahamutan sa Dios, nga mao ang inyong katarunganon nga pagsimba.

Ug dili kamo magpahiuyon niining panahona sa kalibutan: kondili pag-usab kamo pinaagi sa pagbag-o sa inyong salabutan, aron inyong hisayran kong unsa ang maayo, ug hingpit. . . maayo, makapahimuot, ug hingpit, nga kabubut-on sa Dios.

³² Karon, kung itugot sa Ginoo, gusto ko nga kuhaon ang akong hilisgotan alang niining buntaga, mahitungod sa: *Ang Gahum Sa Dios Sa Pag-usab.*

Aron dili kamo magpahiuyon niining panahona sa kalibutan: kondili. . . pag-usab pinaagi sa pagbag-o sa inyong salabutan, karon, ug hisayran kung asa ang maayo, hingpit, ug makapahimuot, nga kabubut-on sa Dios.

³³ Kini usa ka karaan og pamilyar nga teksto nga kanunay'ng gigamit sa inyong mga pastor sa dugay'ng panahon. Dugay na kining gigamit sukad nga gisulat Kini. Apan bisan pa niana, ang usa gyud ka butang sa Pulong sa Dios, mao nga Kini dili gayud madaan, tungod kay ang Dios Kini. Dili gayud Kini madaan. Sa tanan nang mga henerasyon, nga hapit, nga mga baynte otso na ka gatus ka tuig, o mas dugay pa, kining Pulong sa Dios dugay nang ginabasa sa mga tawo, sa mga pari, ug uban pa, ug wala gyud Kini nadaan. Dugay ko na Kining ginabasa, ako mismo, sulod sa traynta'y-singko na ka tuig. Ug sa matag higayon nga akong basahon Kini, adunay ko'y bag-ong butang nga makaplagan nga wala ko nakita sa unang higayon. Tungod, Kini dinihogan, ang Dios Kini diha sa letra nga porma. Kita n'yo, Kini ang mga kinaiyahan sa Dios nga nagapamulong, ug gisulat sa papel.

³⁴ Daghang mga higayon, nga ang tawo moingon, “Bueno, karon, tawo ra man ang nagsulat niining Biblia.” Dili. Ang Biblia nagaingon, Mismo, nga ang Dios ang nagsulat sa Biblia. Pulong Kini sa Dios.

³⁵ Ug Kini dili gayud mapakyas. Si Jesus miingon, “Ang mga langit ug yuta mapakyas, mangahanaw, apan dili gayud mapakyas ang Akong mga Pulong.” Ug dili Kini mapakyas, ingon nga Dios, tungod kay kabahin Kini Kaniya.

³⁶ Ug ikaw ingon nga Iyang anak nga lalaki ug anak nga babaye, ikaw kabahin Niini, ug kana nagapahimo kanimo nga kabahin Niya. Mao kana kon nganong nagaanhi kita aron magkauban nga nagapakig-fellowship sa Pulong sa Dios.

³⁷ Bueno kining pulong nga *giusab*, gipangita nako kini sa diksyonaryo, kagahapon. Sa dihang, hapit na nako malimtan ang oras nga angay diay ania na ako dinhi, niadtong nangita ko sa usa ka teksto, ug akong nakaplagan kini nga pulong, o kining teksto, diay, Kasulatan. Ug diha sa diksyonaryo kini nagaingon nga kini “usa ka butang nga nabag-o.” Kinahanglan kini nga “mabag-o.” *Giusab*, “nalahi na kaysa kung unsa kini kaniadto, kaniadto . . . ang kinaiya niini ug ang tanan nga anaa niini nabag-o na,” *ang pag-usab*.

³⁸ Ug akong napamalandongan karong buntaga, diha sa Genesis 1. Kini nga kalibutan awa-aw pa kaniadto, ug kini walay sulod, ug ang kangitngit diha sa ibabaw sa yuta; kini wala’y lain kondili bug-os nga kagubot. Ug sa dihang kini nga kalibutan anaa sa maong kahimtang, ang Espiritu sa Dios naglihok ibabaw sa nawong sa tubig, ug ang tibuok hulagway nausab; gikan sa usa ka bug-os nga kagubot, ngadto sa usa ka tanaman sa Eden. Mao kana ang gahum sa Dios sa pag-usab, nga himoon ang wala ngadto sa usa ka pagkamaanindot nga butang. Ang makapabag-ong gahum sa Dios!

³⁹ Ug nasabtan nato kana, pinaagi sa pagbasa sa mga Kasulatan, nga ang Dios unom—unom ka libo ka tuig ang gihimo niyang mga pagpangandam alang niini nga Eden. Bueno, dili man siguro Siya nadugay sa ingon niana kataas; apan bana-bana ko lang, ug akong gibasihan ang Kasulatan diin Kini nag-ingon “ang usa ka adlaw sa Dios, usa ka libo ka tuig sa yuta,” kana, kon ang Dios ang mag-ihap sa oras. Ug ingnon nato nga unom ka libo ka tuig ang Iyang paghimo sa kalibutan, ug Iyang gitatum sa yuta ang tanang maayong binhi. Hingpit gyud kaayo ang tanan kaniadto.

⁴⁰ Nagtoo ko nga, sa daghang mga higayon, bisan ang mga kritiko pagmobasa nianang Basahon sa Genesis, sawayon nila Kini, tungod kay daw sa kanunay konong ginasubli Niini ang Kaugalingon Niini, o daw sa ginapalibog ka kono dinhi ug dinha.

⁴¹ Apan kung mamatikdan lang nato sa makadiyut, sa dili pa kita maghisgot sa atong teksto, nga, nakita ni Moises ang panan-awon. Ug nakigsulti kaniya ang Dios. Nakigsulti ang Dios kang Moises nga atubangay gyud, nga baba ngadto sa dalunggan. Karon, wala gayud Siya nakigsulti ni bisan kinsang tawo nga sama niana, sama sa Iyang gihimo kang Moises. Karon, si Moises usa ka halangdon, usa sa labing bantugan sa tanang mga propeta. Usa siya ka tipo ni Cristo. Ug karon ang Dios

makasulti, aduna Siya'y tingog. Nadungog na kini. Makasulti ang Dios.

⁴² Ug makasulat pud ang Dios. Ang Dios ang nagsulat sa napulo ka Sugo gamit ang Kaugalingon Niyang tudlo. Nagsulat siya sa mga bongbong didto sa—sa Babilonia sa makausa, gamit ang Iyang tudlo. Miduko Siya ug misulat sa balas usa niana ka higayon kaniadto, pinaagi sa Iyang tudlo. Makapakig-estorya ang Dios. Makabasa ang Dios. Makasulat ang Dios.

⁴³ Ang Dios mao ang Tuboran sa tanang grasya ug Gahum, ug ang tanang Balaanong kaalam, anaa sa Dios. Ug busa, nasayod kita nga, Siya lamang ang nag-inusara nga Magbubuhat. Walay laing magbubuhat gawas sa Dios. Si Satanas dili gayud makalalang, sa bisan unsang paagi, iya lamang ginatuis kung unsa na ang linalang. Pero ang Dios lamang ang nag-inusarang Magbubuhat.

⁴⁴ Busa, Siya nagamugna pinaagi sa Iyang Pulong. Iyang ginapadala ang Iyang Pulong. Busa ang tanang mga binhi nga Iyang gipugas sa yuta, Iyang giumol kadtong mga binhi pinaagi sa Kaugalingon Niyang Pulong, tungod kay wala ma'y laing paagi nga magpatungha sa maong binhi. Gibutang Niya ang mga niini, ug anaa sa ilalum ang mga niini sa tubig. Iya lang gilitok, “Motungha ang *ingon niini*, ug motungha ang *ingon niana*.”

⁴⁵ Karon atong makita nga, sa makadaghang higayon, ang Biblia mora ba'g nagasubli o nagasulti og mga butang nga wala man Niini ginasulti. Pananglitan, sa Genesis 1 makita nato nga, “Gibuhat sa Dios ang tawo diha sa Iyang Kaugalingong dagway, sa dagway sa Dios gilalang Niya siya; gilalang Niya sila nga lalaki ug babaye.” Ug dayon nagpadayon pa Siya, ug daghang mga butang ang nahitabo sa ibabaw sa yuta.

⁴⁶ Dayon hingsayran nato, nga wala pa'y tawo nga magatikad sa yuta. “Mao nga gilalang sa Dios ang tawo gikan sa abog sa yuta.” Lahi kadto nga tawo. “Ug Iyang gihuypan siya sa espiritu sa kinabuhi, ug nahimo siyang buhi nga kalag.”

⁴⁷ Ang unang tawo kadto nga sumala sa dagway sa Dios, nga mao ang Espiritu. Ang Juan 4, nagaingon, “Ang Dios Espiritu, ug ang mga magasimba Kaniya kinahanglan managsimba Kaniya sa Espiritu ug sa Kamatuoran.” Tungody kay ang Dios Espiritu man. Ug ang unang tawo, nga Iyang gilalang, mao ang espiritung-tawo, ug siya anaa sa dagway ug anaa sa panagway sa Dios.

⁴⁸ Ug ayha Niya gibutang kini nga tawo sa unod, ug nahulog ang maong tawo. Busa mikanaug ang Dios ug nahimong dagway sa tawo, aron matubos Niya ang kadtong nahulog nga tawo. Kana ang tinuod nga estorya sa Ebanghelyo, sa akong—sa akong opinyon.

⁴⁹ Karon, ang Dios, sulod sa unom ka libo ka tuig, nagtanum na niining tanang maanindot nga mga binhi, o Iyang gilitok ang

Iyang Pulong, “Kini mamahimong ingon *niini*. *Kini* nga kahoy mamahimo. *Kini* mamahimo.” Hingpit pa ang tanan kaniadto. Maanindot kaayo kadto. Ug gimandoan Niya ang matag usa niadtong mga binhi nga mamahimo kung unsa sila, nga ang ilang kaugalingon mamahimong tanum sumala sa kung unsang matang sa kinabuhi ang gilitok sa Pulong sa Dios diha kanila. Kung kini usa ka kahoy’ng encina, kinahanglan motubo kini ingon nga usa ka encina. Kung kini usa ka kahoy’ng palma, kinahanglan motubo kini ingon nga usa ka palma.

⁵⁰ Tungod kay, gipadala na man sa gamhanang Magbubuhat ang Iyang Pulong, ug atua na ang binhing Pulong sa wala pa maporma ang mismong binhi. Ug ang maong Pulong ang nag-umol nianang binhi. Kita n’yo, “Gibuhat Niya ang kalibutan gikan sa mga butang nga dili makita.” Kita n’yo, Siya—Iyang gibuhat ang kalibutan pinaagi sa Iyang Pulong. Gilitok lamang sa Dios ang tanang mga butang ngadto sa pagkatungha.

⁵¹ Ug ingon nga Dios, ang Magbubuhat, nga gilitok ang tanang butang ngadto sa pagkatungha, siguradong hingpit gyud kadto nga kalibutan. Usa kadto—usa ka maanindot nga lugar. Usa kadto—usa ka tinuod og matuod nga paraiso dinhi sa yuta.

⁵² Karon, ingon nga, ang matag dapit aduna gyu’y usa ka punoang-buhatan sa kung asa man. Ngani kini nga konbensyon aduna ma’y usa ka punoang buhatan, ug kini nga chapter aduna pu’y usa ka punoang-buhatan, ug ang iglesia aduna gyu’y usa ka punoang buhatan. Ug ang Dios aduna pu’y punoang-buhatan. Ug busa kining halangdong lugar, nasud nga atong ginapuy-an, aduna pud kini’y usa ka punoang-buhatan. Ug mao nga kining halangdong Eden aduna kini’y punoang-buhatan, ug ang punoang-buhatan niini nahimutang sa tanaman sa Eden, o sulod sa Eden, nga anaa sa sidlakan sa maong tanaman.

⁵³ Ug gibutang sa Dios sa ibabaw niini, aron dumalahon ang tanan Niyang dagkung binuhat dinhi sa yuta, ang Iyang anak ug ang pangasaw-onon sa Iyang anak, nga mao si Adan ug si Eva.

⁵⁴ Ang Dios mao ang Amahan ni Adan. “Si Adan . . . ang anak sa Dios,” sumala sa mga Kasulatan. Siya ang anak sa Dios.

⁵⁵ Ug ang Dios naghimo para kaniya og usa ka kaabag, gikan sa mismong lawas ni Adan; malagmit usa ka gusok gikan sa ibabaw nga bahin sa iyang kasingkasing, aron kini mamahimong duol kaniya, ug gihimoan siya’g usa ka kaabag. Dili pa kini iyang asawa, ni siya bana niini; mao pa’y paglitok Niya niini. Ug dinha miabot ang problema, kay naunahan man ni Satanas si Adan kang Eba. Busa, Pulong pa lamang Niya kini nga gilitok Niya.

⁵⁶ Ingon ko nga, dili ko gusto nga mogahin og daghang oras mahitungod niini. Apan basin ang uban kaninyo maglibog, labi na kadtong pipila ka mga tawo gikan sa—sa Habagatan, medyo makalibog kini para sa ila, sa maong mga tawo, kining akong Mensahe karon nga gikan sa Dios, kadtong mahitungod sa binhi

sa serpente. Ug mopauli na ako, kung itugot sa Ginoo, usa niining mga adlaw, sa Jeffersonville. Gusto unta nako nga magsensahe nga abton og mga unom ka oras, ug tul-iron ang tanan sa mga niini, kita n'yo, kanang ilatag kini sa paagi nga inyo gayud masabtan kung unsa ang atong ginahisgotan. Ug kini ang MAO KINI ANG GINAINGON SA GINOO. Ingon gyud katinuod sama sa dihang nakita Niini ang atong Igsoong Florence sa wala pa siya mipanaw, mga pipila na ka tuig. Kita n'yo, Kini ang Kamatuoran. Ug bueno, kita . . . tingali nasaypan lang kini sa pagsabot.

⁵⁷ Kung adunay moduol kanako, nga daw sukwahi, medyo masayup pud ako sa pagsabot niini, ako mismo. Dili ko gustong manaway kung unsa man ang ginasulti ni bisan kinsa. Dili angay nga magsinawayay kita. Dili ako sad-an sa pagbuhat niana; nagapasalamat ako sa Ginoo. Ginasaway ko lang ang sala ug ang dili-pagtoo; apan dili ang indibidwal nga tawo, kita n'yo, ako—dili ko ginabuhat kana. Kita'y—kita'y managsoong mga lalaki ug babaye, nga nagapanlimbasog, nga moabot pud kita sa punto nga naabot sa atong Igsoong Florence kagahapon sa buntag, kita n'yo. Siya . . . Kita—kitang tanan siguradong padulong sa ingon nianang direksyon. Ug wala sa akong katuyoan nga—nga manaway og igsoong lalaki o babaye nga dili mouyon kanimo. Dili, halayo ra gyud kanako nga buhaton kana! Dili ko motoo nga may makita mo og teyp nga duna ko'y tawong gipangalanan. Nga, gibati ko sa daghang mga higayon nga nasayup ang maong tawo, apan kana tali kanila lamang ug sa Dios. Apan ang sayup, kung paghisgotan ang sala ug . . . Ug ang dili pagsinabtanay usahay dili gani matawag og sala, kini mga sayup lamang nga pagsabot sa mga tawo. Ug ako—nagtoo ko nga ang matag usa kanato adunay katungod sa pagpahayag sa atong kaugalingon sumala sa atong pagsabot.

⁵⁸ Karon kining gamhanang Magbubuhat nagpahimutang sa Iyang binuhat nga anak. Karon, si Adan mao ang Iyang unang binuhat nga anak. Si Jesus mao ang Iyang bugtong *gihimugso* nga Anak, kita n'yo, Siya'y gihimugso sa usa ka babaye. Apan si Adan gikan mismo sa kamot sa Dios, kaniadtong paglalang.

⁵⁹ Karon kining punoang-buhatan, nga gidumalahan sa Iyang—sa Iyang anak ug pangasaw-onon sa Iyang anak, daw sa hingpit kaayo. Adunay usa ka—usa ka lalaki, ang ulo sa tanan niini, ang Iyang Kaugalingong anak nga lalaki ug ang pangasaw-onon niini.

⁶⁰ Ug hingpit ang tanang binhi, ang mga palma, ug ang mga encina, ug ang balili, ug ang mga langgam, ug ang mga mananap. Ug ang tanan anaa sa hingpit nga pagkahan-ay sumala sa Sugo sa Dios, “Ayaw usba ang imong kinaiyahan. Pamunga mo sa inyoha rang matang, ang matag binhi! Ikaw encina, ayaw gyud kahimong punoan sa kapayas.” Kita n'yo? “Palma, ayaw gyud kahimo'g laing punuon. Kondili ang matag binhi sumala ra gyud

sa iyahang matang!” Ug Iyang—Iyang gibantayan kini sa tanang panahon.

⁶¹ Ug Iyang gilitok ang Pulong. Ug ang Iyang dakung Gahum sa paglalang maoy nag-umol niining mga butanga nga mitungha, ug bisan pa niadtong lalaki ug babaye. Ug sila mao ang pangulo tungod kay sila mao ang . . . labaw sa tanang ubang mga binuhat. Ug gibutang pud Niya sila ubos sa pag-amuma sa mao rang butang nga gibutangan Niya sa mga kahoy, mga mananap, ug uban pa: nga mao ang Iyang Pulong. Kinahanglan nga dili gayud nila, sa bisan unsa man nga paagi, lapason kana nga Pulong. Kinahanglan sila magpabilin Didto. “Ayaw gayud pagkuha ug bisan unsa gikan Niini, o pagdugang og bisan unsa Niini! Kinahanglan kang magkinabuhi pinaagi niining Pulong.”

⁶² Ug kung ang tibuok kabuhatan nagpabilin lang unta nga ingon niana, dili unta kinahanglan pa ni Igsoong babayeng Shakarian nga mopanaw karong buntaga, kung nagpabilin lang unta kini nga ingon niana, sa dakung ekonomiya sa Dios! Kini mao ang atong ginatooan nga atong paingnan pabalik. Pabalik na kita niana nga dapit, niana nga kahintang.

⁶³ Diin niadtong ikapitong buntag, sa dihang gitan-aw sa Dios kining tanan, ug Siya miingon, “Maayo kini. Ako—Ako nalipay niini. Oo, Ako—Ako—nalipay Ko nga gihimo Nako kini. Ug kining tanan kontrolado na. Ug ginasalig Ko na sa Akong anak ug sa iyang asawa, nga—nga ilang (himoan silang pangulo sa tanan niini), nga ilang bantayan kini tanan ug siguradohon nga kini maayo, nga ang tanan mamunga sa iyang kaugalingong matang. Karon aduna na siya’y kagahum sa pagbuhat niana.” Dayon miingon ang Dios, “Bueno, kung kining tanan maayo kaayo, ug kini dili mamahimong uban pa, tungod kay kini mao Mismo ang Akong tinguha. Ingon-ani mismo ang Akong gusto. Ug gilitok Ko kini nga mamaingon niana, ug ang Akong mga Pulong mao’y nagpatungha niini sa eksakto gayud kung unsa ang Akong gusto niini. Ug ingon niana kini. Kining tanan maanindot kaayo!” Busa miingon ang Biblia, “Mipahulay ang Dios sa ikapito nga adlaw, gikan sa tanan Niyang mga buhat.”

⁶⁴ Ug ang tanan-tanan kontrolado, aron mamunga ingon sa iyang matang. Karon hinumdumi, “aron mamunga.” Sa diha nga Iyang gipugas kaniadto ang binhi dinhi sa yuta, ang binhi motubo lamang pinaagi sa gahum sa kinabuhi nga anaa sa sulod niini, aron himoon kini gikan sa pagkabinhi ngadto sa pagkatanum, o kung unsa man kini. Kadto ang Iyang gahum sa pag-usab! Karon, gibutang sa Dios ang binhi sa sulod niana, nga adunay potensyal nga mamahimo kini ingon sa kung unsa Iyang gilitok nga mamahimo kini. Ug kung kini magapabilin lang diha sa iyang husto nga matang, mamahimo kining mao gyud kung unsa ang giingon sa Dios nga mamahimo niini. Sigurado kining mamaingon gyud niana, tungod kay gibuhay Niya kini nga ingon niana, ug nagbuhat og usa ka agianan. Nga, ang bisan

unsang matang nga nagasubay sa Iyang agianan, nagasubay sa linya sa Iyang Pulong, siguradong mamunga kini sa ingon ka eksakto sa giingon sa Iyang Pulong nga igapamunga niini. Dili gyud kana motipas gikan dinha. Kay giniyahan kini sa eksakto gayud. Busa, ingon nga gisalig ang tanan sa Iyang Kaugalingong Anak, nga kini mamaingon gyud niana, nan ang Dios miingon, “Maayo na ang tanan, busa puede na Akong mopahulay. Ug ang matag usa niadtong mga binhi adunay gahum, sa paghimo sa kaugalingon niini ngadto sa matang nga Akong gusto. Mao kana ang kinahanglan nga mahitabo, tungod kay gihatagan Ko ang matag binhi og gahum sa pag-usab, sa paghimo sa iyang kaugalingon, gikan sa iyang potensyal karon ngadto eksakto kung unsay gusto Nako kaniya.”

⁶⁵ Ang Dios wala gayud mausab. Siya mao ra sa gihapon kung unsa Siya kaniadto! Kung ang Dios adunay gitinguha nga buhaton. Iya gyud kining pagabuhaton. Walay bisan unsa man nga makapugong Kaniya. Pagabuhaton gyud Niya kini!

⁶⁶ Karon human nga ang tanan maayo na kaayo ug nahanay na, ang Dios sigurado na gyud nga kining tanan mamaayo ra, ug dayon, sa dihing sigurado na Siya, diha pud misulod ang kaaway. Ako kining. . . Ang Dios naghatag og gahum sa pag-usab. Ug ang akong masulti niining kaaway, aduna siya’y gahum nga dili—sa paglalang na usab, apan akong. . . Siya adunay gahum sa pagdaut, dili ang pag-usab; apan sa pagdaut. Bueno, ang unsa mang butang nga gidaut mitipas gikan sa iyang orihinal nga kahimtang, nga aduna gyu’y sayup nga nahitabo niini.

⁶⁷ Pipila na ka mga tuig ang milabay, kaniadtong atua pa ko sa pagpatrolya, didto sa umahan sa mais, nahinumduman nako kadtong, usa ka sanga nga napolit gikan sa kahoy, ug nahulog kini sa usa ka punoan sa mais. Ug ang lindog naningkamot gyud kutob sa mahimo niini nga motubo nga tul-id sama sa angay niya nga pagtubo, apan nadaut kini tungod sa nahitabo. Ug gidatogan kini niadtong sanga.

⁶⁸ Dayon aduna kami’y nakita og tanum nga nagakatay didto sa maong umahan. Nga, daghan kaninyong mga lalaki dinhi, ug tingali ang uban kaninyong mga babaye. . . kung kamo taga-Kentucky. Ang mga babaye didto mogamit og sarol nga sama sa lalaki, moadto sila sa uma nga may—dala og sarol, gitawag namo kini og gooseneck nga sarol, ug putlon kadtong—nagakatay nga mga sagbot. Kay, kung dili nimo tangtangan kadtong mga sagbota, kon diin didto naglinya ang mga mais, sama *niini*, nan mokatay kadtong sagbota, ug mokapyot niadtong mais, ug hinayhinay nga ilikos ang kaugalingon niini, sa ingon kasayon, sa ingon ka maliputon nga paagi, nga halos dili nimo kini mamatikdan. Ug sa ulahi nagkaanam kini nga nagkalig-on nga nagkalig-on, ug gihugtan pa ang pagkalikos niini nianang mais hangtud nga mangabaliko kini. Samot pang ginahugtan, ang

pagkalikos sa bagon niini; aron balikong-baliko ang mais gikan sa kung unsa kini kaniadto, nga mamahimong dili na mao. Mais kini gihapon, apan daut na nga mais.

⁶⁹ Ug kitang tanan anaa pa gihapon sa dagway sa Dios. Apan ang uban baliko na kaayo, ingon nga mga anak sa Dios, nga nagalakaw nga supak sa Iyang Pulong ug supak sa dalan nga—nga Iyang gihatag ug gitagana kanato nga pagalakwan. Adunay ginapahimutang, ang kalibutan aron ipahisalaag kita sa atong dalan, birahon kita paduol niini, ug ipahilayo kita gikan sa tulid, ug mahiktin nga dalan diin Iya kitang gipahimutang, aron mamahimong mga anak nga lalaki ug babaye sa Dios. Ang sala ang maoy naghimo niining dautang butang ngadto sa mga anak nga lalaki ug anak nga babaye sa Dios.

⁷⁰ Ang tigbaliko! Nasayod ko nga mora kini'g dili maayo isulti sa ingon niini nga paagi, “aron—aron baliko-on,” apan mao gyud kana siya; siya mangbaliko, o mangtuis. Ang *pagtuis* nagakahulogan og “usbon, himoon nga lahi na.” Ug ang *pagbaliko* mao ra gihapon, nga kini giusab ug gidaut, ug “gihimo'g lahi.” Pero mao ra gihapon nga binhi, apan baliko na kini.

⁷¹ Karon atong nasayran nga kining tigbaliko nagkaaduna pud og parehong gitas-on sa panahon, aron mangbaliko, sama niadtong nangporma ang Dios. Karon gitanum niya ang iyang binhi, o, wala man gyud diay siya nagtanum sa iyang binhi, siya . . . didto sa tanaman sa Eden. Sukad niadtong panahona, aduna siya'y unom ka libo ka tuig aron baliko-on ang Binhi sa Dios, nga mao ang Pulong sa Dios; aron baliko-on Kini, ug himoon Kini nga lahi na; sa dihang siya . . . sa unang higayon nga si Eva naminaw kaniya, ug nadani kini sa usa ra ka gamay'ng pamulong.

⁷² Hinumdumi, gikutlo una ni Satanas kadto nga Kasulatan nga ingon gyud ka klaro, “Ang Dios nag-ingon nga, ‘Dili ka magkaon gikan sa tanang kahoy sa tanaman sa Eden?’” Kita n'yo? “Dili ka magkaon sa tanang kahoy?”

⁷³ Ug hinumdumi, si Eva miingon, “Oo, mahimo kaming mokaon sa tanang kahoy; apan ang kahoy nga anaa sa tunga sa tanaman, dili gyud namo puede bisan hikapon man lang.” Karon bantayi siya, diha sa iyang pagmensahe, nga ginatuis lang gamay kanang Pulong. Sa pag-ingon . . . si Eva miingon, “Kay ang Dios nag-ingon, nga, kung amo kining buhaton, nianang adlaw kami 'mamatay.’”

⁷⁴ Miingon siya, “Oh, dili gyud ka mamatay.” Kita n'yo, siya usa ka—usa ka tawo, ingon niya, “Ikaw—ikaw—kini ang imong buhaton karon. Ug, ikaw—ikaw—ikaw medyo usa ka tawo nga wala'y alamag. Kay ikaw, sa tinuod, wala gyu'y kahibalo sa tanang butang. Apan kung ikaw moambit lamang niini, nan ikaw makabaton og kaalam, ikaw makabaton ug kahibalo.

Mahibaloan nimo ang maayo sa dili-maayo ug mahisama ka sa mga dios, ikaw, kon ikaw moambit lamang niining kaalam nga aduna kanako. Nahibalo ko, apan ikaw wala.”

⁷⁵ Ug, maayo man nga adunay kaalam. Apan kung ang kaalam sukwahi, kung ang kaalam dili husto nga kaalam nga gikan sa Dios, nga Balaanong kaalam, ug mamahimo lang kini'g natural nga kaalam, wala ko'y labot bisan unsa pa kadaghan nga siyensiya ang anaa kanato, ug kung unsa pa, o edukasyon, kini iya sa yawa. Akong pamatud-an kini kaninyo, kung itugot sa Ginoo, sa pipila ka minuto. Nga kini iya sa yawa.

⁷⁶ Ang sibilisasyon iya sa yawa. Bag-o lang ko nagwali mahitungod niana. Ang tanang kultura sa yuta, tanang gahum sa siyensiya, ug tanan-tanan niini, iya sa yawa. Iya kining ebanghelyo nga iyang giwali, nga mao ang kahibalo, didto sa tanaman sa Eden. Ug iyang gigamit kana nga kahibalo, tinuis nga kahibalo, nga supak sa Pulong ug supak sa kabubut-on ug plano sa Dios. Ug karon aduna siya'y unom ka libo ka tuig sa pagbuhat sa eksakto kung unsa ang gibuhay sa Dios, pero sa pagtuis lamang nga paagi, ug migahin og samang gidugayon sa panahon aron tukuron ang iyahang Eden. Karon aduna na siya'y Eden dinhi sa yuta, ug puno kini sa kaalam, ug kahibalo. Mao kana ang iyang ebanghelyo sa sinugdanan pa lang, kahibalo, kaalam, siyensiya. Ang Dios wala gayud sukad migamit og ingon niana. Ug ako—gusto kong matikdan mo kini sa makadiyut. Gibuhay niya kini, ug tungod nga siya usa ka tawo nga may kalibutanong kaalam.

⁷⁷ Karon, lisud nga isulti kini. Kini'y—lisud gyud kaayo kini, tungod kay namulong ako sa mga tawo nga pareho ra kanako, ug kung unsa ako sulod na niining daghang mga катуigan. Apan sukad sa pag-abli niadtong Pito ka Selyo, mahitungod usab sa mga Manulonda nga atua luyo sa bukid, *Kini* nahimong usa ka bag-ong Libro. Kining mga butang nga dugay nang gitago, ginapadayag na sama sa gisaad sa Dios diha sa Pinadayag 10, nga Iyang buhaton kini. Ug kita ang mapribilihiyong mga tawo nga gipili sa Dios, dinhi sa yuta, nga makita ug masabtan kining mga butanga; maingon nga dili og unsa lang nga tinumotumo, gikan sa unodnon nga panghunahuna sa usa ka tawo. Kini ang Pulong sa Dios nga gipadayag, gipamatud-an, nga Kini husto. Napamatud-an, dili pinaagi sa siyensiya, kondili pinaagi sa Dios, nga Kini husto. Ang Dios, sama sa akong giingon na kaniadto sa usa ka mensahe, ang Dios wala magkinahanglan ni bisan kinsa nga maghubad sa Iyang Pulong. Siya ang Iyang Kaugalingong Maghuhubad. Kung Siya moingon nga kini mahitabo, ug mahitabo gyud kini. Sa ato pa, Iyang—pag Iya nang ginapamatud-an kini, mao na'y hubad niini.

⁷⁸ Pipila ka tuig ang kaniadto, kitang mga pentecostal, kaniadtong ang—ang ubang iglesia giingnan kita'g “buang,” nga kita kono “nasayup, ug ang Espiritu Santo usa ka butang nga

iya sa nangagi nang panahon.” Pero hingsayran nato nga ang saad sa Dios alang sa kang bisan kinsa nga gusto, ug karon mas nasayod kita. Kita n’yo, ug kana sa hinayhinay lang, nga naabli kini nga butang.

⁷⁹ Ug karon Siya misaad nga ang mga misterio nga natago niadtong, tanang mga kapanahonan sa iglesia, igapadayag mismo sa katapusang panahon. Ug Iya kitang gipahanugotan nga makahibalo karon. Ania na kita sa kaulahiing panahon. Ania na kita nianang panahon karon.

⁸⁰ Karon, si Satanas mao ang tigpasugod sa sibilisasyon. Siya ang tigpasugod sa siyensiya. Siya ang tigpasugod sa edukasyon.

Moingon ka, “Tinuod ba kana?”

⁸¹ Sige, basahon nato ang Pulong sa Dios karon, sa Genesis 4, ug balikan nato ug tan-awon sa makadiyut. Nasayod ko nga siguro. . .kung malangay man ko, tingali pahibaloon ako ni Igsoong lalaking Carl. Apan, ang Genesis, ang ika-4 nga kapitulo, ug ang ika-16 nga bersekulo, nagaingon dinhi, nga sa sinugdanan, kung unsa ang gibuhay sa Dios, aron ipahimutang ang tunglo ngadto sa lalaki ug babaye, ug sa tanan nga ilang pagabuhaton; ug dili diay nga *gitunglo* sila, apan gisultihan sila kung unsay mahitabo, ug gitunglo ang yuta tungod kang Adan. Ug atong nasayran dinhi karon, nga si Eva nanganak og kaluha. Ug ang usa sa niining duha iya ni Satanas, ug ang usa iya sa Dios.

Karon moingon ka, “Uh-oh! Dili. Bueno, Igsoong Branham!”

⁸² Kadali lang. Pakitai ko’g usa ka Kasulatan, bisan asa, nga nagaingon nga si Cain anak ni Adan. Ipakita pud nako kaninyo diha sa Kasulatan diin Kini nag-ingon, “Si Cain gikan niadtong daotan,” dili kay Adan.

⁸³ Karon matikdi nga sa dihang nanamkon si Eba. Magsugod kita sa ika-4 nga kapitulo, una.

Ug giila ni Adan. . .ang iyang asawa; ug siya’y nanamkon, ug nanganak kang Cain, ug miingon, nakabaton ako. . .siya miingon karon, nakabaton ako og anak nga lalaki sa panabang sa GINOO.

⁸⁴ Siyempre, ingon niana man gyud kana. Bisin pa kung bigaon kini o kung unsa man, maggikan gyud kini sa Dios, kita n’yo, kay Iya man kanang binhi, ug kini ang balaod sa Iyang binhi, kini kinahanglan nga mogula bisan pa nga kini dunot nga binhi, tinuis nga binhi, o unsa man kini. Kini mogula gayud, bisan unsa pa man. Kay kini maoy Iyang sugo.

Ug unya usab nanganak siya kang Abel nga iyang igsoon.

⁸⁵ Wala na siya nag-ila pa. Si Adan miila sa iyang asawa, ug nanganak siya kang Cain ug nanganak usab kang Abel, kaluha.

Nakigdulog na si Satanas sa babaye niadtong buntaga, sa pagkahapon si Adan na.

⁸⁶ Nakita na ninyo kadtong gikaguliyangan sa mantalaan dinhi, nga akong gitooan, sa Tucson kini nahitabo, mahitungod niadtong babaye nga nanganak ug usa ka itum nga bata ug usa ka puti nga bata, sa mao rang higayon. Nakighilawas siya sa iyang bana niadtong buntaga, ug sa pagkahapon sa ubang lalaki na. Ug atimanon man niadtong lalaki . . . miingon ang lalaking puti nga iyang atimanon lamang kadtong iyang kaugalingong anak, ug ang itum nga lalaki kinahanglan pud nga atimanon ang iyang kaugalingong anak. Kita n'yo? Nasayod ko nga, sa pagpasanay sa mga iro ug uban pa, puede gyud kini, kung pipila lang ka oras ang lak-ang. Kini ang nagapamatuod niana.

⁸⁷ Karon aron maipakita kung diin gyud gikan ang sibilisasyon, atong basahon ang Genesis dinhi, sa ika-4 nga kapitulo sa Genesis pag-usab, ug tan-awon nato kung asa. Ang ika-16 nga bersekulo.

Ug mipahawa si Cain sa atubangan sa Dios, ug mipuyo sa yuta sa Nod sa silangan nga bahin sa Eden.

Ug giila ni Cain ang iyang asawa; ug kini siya nanamkon, ug nanganak siya kang Enoch: ug nagtukod siya og usa ka lungsod, ug ginganlan niya ang ngalan sa lungsod, nga sunod sa . . . iyang anak, nga Enoch.

⁸⁸ Dinhi nagsugod ang sibilisasyon. Si Doktor Scofield, dinhi sa akong Scofield nga Biblia, kini nagaingon, “Ang unang sibilisasyon.” Matikdi, dayon nanganak siya ug mga lalaki, ug naghimo sila og mga organo ug musika. Ang sunod nanganak og mga anak nga lalaki, ug nagsugod siya sa pagbuhat og ubang mga butang, mga katingalahan, nagtukod og mga lungsod, ug—ug naghimo og mga galamiton nga gikan sa tumbaga, ug tanan nang matang sa mga butang. Kita n'yo, mao kana ang iyang gibuhay, nahimong unang sibilisasyon, nga mao ang mga kaliwat ni Cain. Iyang gibuhay ang samang butang latas sa mga kapanahonan.

⁸⁹ Karon moadto kita dinha sa ika-25 nga bersekulo, ug matikdi kung unsa ang sunod.

Ug giila pag-usab ni Adan ang iyang asawa, karon, ug kini nanganak og usa ka anak nga lalaki, ug gitawag niya ang iyang nganlan si Seth: Kay ang Dios, miingon siya, nga nagatudlo kanako og usa ka kaliwat nga pulo ni Abel nga gipatay ni Cain.

Ug si Seth . . . Ug kang Seth, usab natawo ang usa ka anak nga lalaki; ug gitawag niya ang iyang ngalan si Enos: ug unya ang mga tawo nanagsugod sa pagtawag sa ngalan sa GINOO (gikan sa kaliwat ni Seth, dili sa kaliwat ni Cain).

⁹⁰ Kita n'yo, kanang bantugan nga intelektuwal nga atong gihuptan pag-ayo! Unsa ang komunismo karon, unsa ba ang ilang dios? Kini mao ang intelektwal, ang siyensiya. Unsa man ang atong ginabuhay, sa gihapon? Asa na man kita nagapuyo? Pamalandungi kining mga pulonga karon.

⁹¹ Karon aduna na siya'y iyahang kaugalingong matang sa Eden, aduna na si Satanas karon. Niining unom ka libo ka tuig, iyang giporma (dili gilalang), kondili, gidaut ang tibuok yuta sa Dios, ang Iyang mga binuhay, ang mga mananap, gipang-interbreed, ug gipang-hybrid; ang mga kahoy, mga tanum, tawo; bisan ang relihiyon, ang Biblia, ang iglesia; nangtud nga nagkaaduna na siya og iyahang kumpletong tanaman sa Eden, sa siyensiya, nga ang tanan ginapalihok pinaagi sa siyensiya. Ang atong mga sakyanan, ang tanan nga aduna kita, gihatag kanato pinaagi sa siyensiya, kung unsa ang nakab-ot sa tawo. Ug gibutang niya ang iyahang dakung Eden dinhi; aron mapamatud-an nga ang Mensahe tukma sa panahon, aron mapamatud-an nga dili kini sa kung unsa nga ubang kapanahonan kondili ang Pinadayag 10 mismo! Tan-awa ang pagpang-hybrid karon, aron lang nga makahimo og mas maayo, o, mas maanindot diay, dili mas maayo. Tan-awa ang gagmay nga mga bata karon.

⁹² Akong gidala ang akong anak nga babaye sa dentista, kagahapon, ug miingon ang dentista nga ang iyang mga ngipon nangahiwi na. Usa ka igsoong lalaki didto sa Tucson, si Igsoong Norman, gidala pud niya ang iyang gamay'ng anak nga babaye, ug ang iyang mga ngipon nagkasungki-sungki. Ug ang dentista nag-ingon nga sa dili madugay, siya nagatoo, nga tingali sa umaabot nga mga panahon, ang mga tawo mahimugso nga, ang mga ngipon motubo sa bisan asa na lang nga direksyon. Tungod kana sa pagkaon nga atong ginakaon, hybrid nga pagkaon.

⁹³ Nabasa ba ninyo ang *Reader's Digest*, sa miaging bulan, bahin kang Billy Graham, ang halangdon nga ebanghelista? Nagasige ba mo paminaw kaniya? Nagaampo gyud ko alang kaniya karon labaw pa kaysa kaniadto. Sa dihang nakigpulong siya niadtong mga pinatikig ang mga kwelyo, ug uban pa, sa miaging gabii, nga iya kadtong gilatang sa mga ministro. Aduna gyu'y nahitabo kaniya. Usa sa niini nga mga adlaw, nanghinaut ko nga makita niya ang iyang posisyon kung asa siya, himatikdi, nagapanawag na karon gikan sa Sodoma, kanang tinuis nga lungsod. Ug karon matikdi n'yo kining anaa sa *Reader's Digest*, nga si Billy luya na kaayo nga dili na niya mapahigayon ang iyang mga panagtigum. Ug giingnan nila siya nga kinahanglan kono niyang magdagan-dagan, mag-exercise, ug uban pa. Maong nagadagan siya'g usa ka milya matag adlaw, sa pagtoo ko ingon gyud niana, o mga ingon niana, aron makapa-ugnat sa kusog.

⁹⁴ Daut na ang tawo. Kontaminado na gyud ang tibuok kaliwat sa tawo. Ang tanang butang daw sama na sa panahon

kaniadto sa wala pa ang lunop. Bug-os nang nagkalamukat, nagkabalit-ad na, nga lahi na gyud kaysa sa tul-id nga laray nga gipahimutangan sa Dios kanila. Ang sala, tungod sa siyensiya ug pagpanglimbong, mituis sa tibuok kaliwatan sa tawo.

⁹⁵ Giapil n'yo pud ba sa pagbasa kadtong anaa sa ubos niadtong artikulo, diin nagsulti kini, "Niining mga adlaw, ang mga batang babaye ug lalaki anaa na sa ilang pagkahamtong, kung basihan ang ilang pisikal nga kahimtangan, tunga-tunga sa baynte ug baynte-singko anyos nga panuigon"? Hunahunaa n'yo kana.

⁹⁶ Sa pagpang-ila niadtong miaging gabii, nakita ko ang usa ka batang babaye nga baynte-dos anyos pa, pero naga-menopos na, gitawag nako siya. Ug mao pud kana ang gisulti sa iyang doktor kaniya.

⁹⁷ Kita n'yo, kini usa ka giut-ut na, alaot, pa-impyerno nga mahugaw'ng kaliwatan. Nasayod ko nga dili kana tarung paminawon, apan Biblikanhon kini, kita n'yo, nga tinuod kini; ug kini ang kaliwatan nga atong gikapuy-an karon, kining henerasyon sa tawo.

⁹⁸ Bueno matikdi n'yo karon, ang pagpang-hybrid sa mga baka, ang pagpang-hybrid sa mga tanum; ug ang siyensiya nagabalik na usab, ang mao rang siyensiya nga mao'y nagapahimo niini, ang ingon gani, "Mao kana ang nagapadaut sa tibuok kaliwatan sa tawo." Mabasa ninyo kini sama sa akong nabasa. Bueno, nganong dili man nila kini pahunongon? Tungod kay dili nila kini mapugngan. Ang Pulong sa Dios nag-ingon nga kini mamaingon gyud niana. Apan kung ila kining hunahunaon sa makadiyut, mga instrumento lang sila, sama ni Judas Iscariote, nga eksaktong ginapahiluna ang butang nga giingon sa Dios nga mahitabo. Ginabuhat nila kini nga eksakto sa ilang kaugalingong sukaranan sa siyensiya.

⁹⁹ Pinaagi sa iyang siyentipikong pagtuki, sa samang paagi kung unsa niya paglimbong kang Eva, iya usab gilimbongan ang iglesia, ingon nga gitipo kini kaniadto ni Eva. Bueno, karon si Adan gitipo kaniadto, o si Eva, diay, gitipo niya ang iglesia, matikdi kung unsa ang resulta niini. Tungod sa tinguha nga makakaplag og kahibalo, nalabang ni Eva ang linya tali sa husto ug sayup, pinaagi sa pagpaminaw sa mga pagpangtuis ni Satanas, o pagpangbaliko, sa orihinal nga Pulong sa Dios.

¹⁰⁰ Ug karon ang mga iglesia sa niining panahon nangabaliko na. Karo wala baya ko maghisgot bahin sa mga tawo, o sa mga indibidwal. Ang ginahisgotan ko maoy mahitungod sa kalibutan sa iglesia. Nga ang usa gituis sa usa ka paagi, ug ang usa usab gituis sa laing paagi, ug, pinaagi sa siyensiya. Sa mao ra mismong paagi nga iyang gibuhat kaniadto. Iyaha na gyud gituman ni Satanas, ang iyahang hulga, diha sa Isaias 14:12.

¹⁰¹ Atong basahon kana sa makadiyut. Diha sa Basahon ni Isaias, atong sugdan ang ika-14 nga kapitulo, sa ika-12 nga bersekulo.

Naunsa ang pagkahulog mo gikan sa langit, Oh Lucifer, anak sa kabuntagon! naunsa ang pagkalumpag mo ngadto sa yuta, nga ikaw man unta ang nagalumpag sa mga nasud!

Si Isaias kini nga nakakita kaniya diha sa usa ka pananawon, kita n'yo, sa umalabot nga kapanahonan.

Kay ikaw miingon diha sa imong kasingkasing, ako mokayab ngadto sa langit, ituboy ko ang akong trono sa ibabaw sa mga bitoon sa Dios: ako magalingkod sa bukid nga tigumanan, . . . sa kinatumyang mga dapit sa amihanan:

¹⁰² Ang katuyoan ni Satanas, gikan pa kaniadto sa Eden, mao ang paghimo sa iyang kaugalingon og usa ka Eden; ug ituboy ang iyang kaugalingon sa kahitas-an, aron ang mga bitoon sa Dios mosimba kaniya, ang mga anak mosimba kaniya. Ug natuman gyud niya kini karon, ug iya na kining nabuhat, ug nakasulod na gyud kini sa iglesia. Nga, dili ko na kinahanglan pang himayhimayon. Kay ang si bisan kinsa kaninyo nga nagapaminaw niining mga teyp nahibalo na niini. Kana—kana mao ang mismong takna nga atong gikapuy-an, ug si Satanas ang nagbuhat niini pinaagi sa programa pang-edukasyon, mas kuwalipikado, mas maayo kay *niini*, mas maayo kay *niana*. Ug wala sila masayod, nga sa tanang panahon, sila nagalakaw diretso ngadto sa kamatayon. Nabutahan, nga nagapanguna sa mga buta, buta nga mga lider sa mga nasud, mga lider nga nabutahan sa siyensiya, buta nga mga pangulo sa iglesia, buta nga nagapanguna sa mga buta. Si Jesus miingon, “Pasagdi ninyo sila, pareho silang mangahulog ngadto sa gahong.”

¹⁰³ Matikdi dinhi kining tipo sa duha ka Eden nga nga daw managsama gayud, nga halos malimbongan ang mismong mga Pinili. Ang Mateo 24:24 nag-ingon nga ingon niana gayud ang mahitabo. Apan gusto kong mohunong kita sa makadiyut ug palangdungan kining duha ka Eden, ug labi na kining usa ka butang, kung giunsa pagsulti kanato sa Biblia nga ang Pulong sa Dios ang nagpatungha nianang Eden, ug kung giunsa pud kita gipasidan-an sa Pulong sa Dios nga moabot pud kining laing Eden.

¹⁰⁴ Karon, nahibaloan pud nato nga siguradong aduna gyu'y usa pa ka Eden, kung mamati kita sa propetang, si Pablo, diha sa Ikaduhang Mga Taga-Tesalonica sa ika-2 nga kapitulo. Puede kong basahon Kini kung gusto ninyo.

Siya nga nagatuboy sa iyang kaugalingon; kanang adlawa nga dili pa moabot, sa Ginoo, hangtud maipadayag na ang tawo sa kalapasan, . . .

...siya nga magalingkod diha sa templo sa Dios, nga nagatuboy sa *iyang kaugalingon batok sa tanan nga gitawag og Dios*, aron siya ingon nga Dios pagasimbahon ingon nga Dios.

105 Palandunga n'yo kana! Karon sa Isaias 14, ang propeta miingon nga iyang nakita “si Lucifer, sa kasingkasing niini,” pinaagi sa usa ka panan-awon ilalum sa dihog sa Dios, “nga nagaingon nga buhaton niya kana.” Diha sa Isaias, walo ka gatus ka tuig nga wala pa si Pablo, o kapin kun kulang.

106 Karon dinhi, walo ka gatus ka tuig human niadto, nakita siya ni Pablo, nga mianha na sa iyang posisyon. Matikdi, mosangpot kini, sa iyang Eden; sa iyang siyentipikanhong Eden, sa iyang siyentipikanhong kalibutan, uban sa iyang siyentipikanhong pangasaw-onong-iglesia, nga ang tanan napailalum sa—sa pulong nga “kahibalo,” mga dagkung seminaryo, mga dagkung digri, mga programa pang-edukasyon.

107 Paminaw kamo, igsoong lalaki, ug igsoong babaye, ang matag usa kanato pagalakwan usab kanang dalan nga gilakwan ni Florence. Ginahangyo ko kamo, sa Ngalan ni Jesus, nga palandongon ninyo Kini. Dili sa ako. Inyo lamang akong igsoon. Kana—dili kini ingon niana. Palandunga ninyo ang Pulong nga akong ginasulti, nga gikan sa Biblia sa Dios. Ug tan-awa n'yo, kini nga hingpit gipanghimatud-an sa Kaugalingong Pulong sa Dios, sa mismong kapanahonan nga atong gikinabuhian, kung asa kita karon.

108 Kining ilang mga programa anticristo gayud, mismo. Karon, kinahanglan niyang magkaaduna og usa ka Eden, kay miingon siya nga buhaton gyud niya kini. Ania ang yanong Pulong sa Dios nga nagaingon nga buhaton gyud niya kini, ug kung ato kanang tan-awon karon ug makita nato nga ginabuhat niya kini. Nabuhat niya kini pinaagi sa iyang intelektuwal, siyentipiko, denominasyonal nga pangasaw-onon. Siya ang mangulo, usa niining mga adlaw, diha sa World Council of Churches nga pagatukuron. Ug ang tanan magaduyog kaniya.

109 Ang mga tawo, dili man gud nga dili sila maayo nga mga tawo; gitanum man gani sila nianang tud-id nga laray, sama sa mais, apan si Satanas nagpugas og nagakatay nga mga sagbot, nga gitawag og siyensiya, pagduki, edukasyon, mga digri sa pagka-doktor. Usahay dili ka nila tugotan nga motindog sa pulpito gawas kon aduna ka'y digri sa pagka-doctor gikan sa usa ka seminaryo. Sayup gyud kaayo! Dili ang mga tawo; apan ang maong programa ang sayup. Ug karon unsa man ang gibuhat niini? Kining tanan paingon na usab, ug magahatud sa tibuok kalibutan (pinaagi sa usa ka pundok sa pagpang-hybrid, pagtuis sa orihinal nga Binhi sa Dios) ngadto sa usa na usab ka mangitngit nga kagubot.

110 Apan malipayon kaayo ko nga ang Dios nahinumdom gyud kanato pag-usab, nga makapamuhat gihapon Siya taliwala niini nga kahimtang. Iyang gisaad nga Iyang buhaton kini, ug magatawag og gamay'ng panon nga mahimong Iyang Pangasaw-onon.

111 Matikdi dinhi pag-usab karon, kung unsa ka hingpit nga tipo kining mga iglesia, o kining mga Eden.

112 Ang Dios, pinaagi sa usa ka Binhi sa Iyang Pulong! Ug adunay usa lamang ka butang nga makahatag og kinabuhi sa Pulong, ug kana mao ang Espiritu, kay Kini mao ang Maghahatag-og-Kinabuhi sa Pulong. Ug sa dihang matagbo sa Kinabuhi nga anaa sa Pulong ang Kinabuhi sa Espiritu, Kini magpabunga og bunga kung unsa man kana nga Binhi.

113 Karon matikdi kung unsa ang nahitabo. Diha sa tanaman sa Eden mao ang ekonomya sa Dios sa pagkawalay-sala, ug kana usa lamang sa—sa mga dispensasyon. Ang unang dispensasyon mao ang pagkaputli, diin ang mga tawo walay nahibaloan nga sala. Wala sila'y nahibaloan bahin sa sala. Parehong hubo si Adan ug si Eva kaniadto, apan gitagoan sila gikan sa ilang pagkahubo, pinaagi sa usa ka tabil nga espiritu nganha sa ilang nawong. Wala gyud sila mahibalo nga sila hubo, man lang, tungod kay sila tinabilan. Kay, ang tabil sa Dios anaa diha sa ilang kaugalingong mga hunahuna, maong wala sila mahibalo kon unsa ang husto ug sayup. Ug silang duha nagatindog didto nga hubo, nagpakita lamang nga ang kahibalo wala pa miabot kanila, kita n'yo, nga sila mga hubo. Ang magtiayon hubo ug wala nasayod niini.

114 Karon kung inyong paklion, kung gusto ninyo, o isulat kini, sa Pinadayag, sa ika-3 nga kapitulo. Ang Balaang Espiritu kini nga nagatagna alang niining katapusang kapanahonan, Kapanahonan sa Iglesia sa Laodiceang Pentecostal sa katapusang mga adlaw, Siya miingon, "Ikaw hubo, ug buta, ug wala masayod niini."

115 Ang Binhi kaniadto sa Dios, ilalum sa pagkawalay-sala, nga sila wala mahibalo kaniadto nga sila hubo, nga napailalum sa tabil sa Balaang Espiritu, nga ginatabilan sila gikan sa sala.

116 Ug karon sa katapusang kapanahonan sa iglesia, atong hingsayran dinhi nga hubo na usab sila, ug wala mahibalo niini. Apan dili na kini ang tabil sa Espiritu Santo. Kini ang tabil nga gitabon ni Satanas kang Eva kaniadto, usa ka tabil sa kailibgon, ang tabil sa kaulag. Grabe na sila kahilas hangtud nga wala na sila mahibalo nga hubo na diay sila, ang atong mga kababayenan diha sa dalan, nanagsul-ob og mga purol, mahilas nga bisti.

117 Naay nagpadala sa ako og usa ka ginunting nga artikulo gikan sa mantalaan niadtong miaging adlaw lang, mahitungod niining bag-ong sinina nga ilang igasul-ob karon, sa tan-aw ko, katorse ra ka pulgada gikan sa bat-ang, o mga ingon-ana lang

kamubo. Ug naghunahuna ko kung atong—kung ang ato bang kababayan-an nakaamgo kaha nga tabil kana sa kailibgon?

¹¹⁸ Karon ikaw—moingon ka, “Ako makapamatuod, atubangan sa Dios, nga ako wala gayud nakabuhat og unsa man nga pagpanapaw sa akong bana, o ako—ako . . . kining tanan.”

¹¹⁹ Apan sa gihapon, didto sa Hukmanan, pagatawgon ka nga usa ka “mananapaw.” Mao kana ang ginaingon sa Biblia. Si Jesus miingon, “Ang si kinsa man nga nagatan-aw sa usa ka babaye nga may pagkaibog kaniya, nakapanapaw na uban kaniya sa iyang kasingkasing.”

¹²⁰ “Buta, hubo, ug wala mahibalo niini!” Dili silang looy ug kabus nga mga babaye didto; wala ko’y bisan unsa nga batok kanila. Apan kadtong dautan! Ug ang sistema sa iglesia mora’g napakyas nga makita kini o napakyas sa pagbarug batok niini; ginatugotan lang sila nga putlan ang ilang buhok, nagapang make-up, ug nagapangsul-ob og mga purol ug mga butang nga sama niana, ilalum sa ngalan sa Cristianismo. Pagkamakalilisang nga butang kana! Kita n’yo, hubo na usab sila, dinha sa Eden ni Satanas, ug wala sila mahibalo niini. Wala sila nakahibalo niini.

¹²¹ Nagtoo ko nga makita ko, tingali, sa pagtan-aw ko dinha gikan dinhi, sa swimming pool, kadtong mga babaye nga atua didto karon. Kung naamgo lang gyud nianang babaye kung unsa ang iyang ginabuhat, apan wala gud siya nahibalo niini. Nga siya hubo. Sagrado ang iyang lawas. Ginahubo sa babaye ang mga bisti nga ginapasul-ob sa Dios kaniya, ang panit, alang niining henerasyon. Anam-anam niyang ginapamub-an kini. Siya’y hubo, ilalum nianang pulong nga “sibilisasyon, mas taas nga edukasyon, mas maayo nga sibilisasyon, mas taas nga pamatasan.” Tugoti ako nga masigurado kining motuhop gayud. Kining tanan iya sa yawa, ug pagalaglagon kini sa Pag-abot ni Ginoong Jesus. Pagagun-obon kining tanan, ang matag tipik niini. Wala ni usa ka butang ang mahibilin pa.

¹²² Ug, oh, higala, sa tibuok nasud, samtang nagapaminaw kamo kanako dinhi sa Phoenix, pamalandonga n’yo kanang mga butanga! Mahimo kamong madani kanila. Karon, gisulti ni Jesus nga, “Limbongan nila ang mga Pinili kung mahimo.”

¹²³ Ang unang espiritu mao ang . . . ang unang tabil usa ka balaang tabil, ang Balaang Espiritu, ug dili unta si Eba angay nga molili pagawas Niana. Pero sa dihang—sa dihang si Satanas misugod na sa pagpakigsulti kaniya mahitungod sa kahibalo, gamay ra nga paglili sa kalibutan ang gikinahanglan niya.

¹²⁴ Ug ingon niana mismo, kung unsa ang gipangbuhat sa iyang anak nga babaye, ang iglesia. Kinahanglan mong makita, kinahanglan mong magsul-ob og sinul-oban nga iya sa artista, o ang mga batan-ong lalaki kinahanglan manglihok nga sama ni

Elvis Presley o—o ni Pat Boone, o—o ni kang kinsang mga tawo, ilalum sa ngalan sa relihiyon.

125 Si Pat Boone usa ka Church of Christ. Si Elvis Presley usa ka Pentecostal. Duha ka nayawaan nga mga tawong naghatud sa kalibutan ngadto sa labi ka grabe nga kagubot kaysa sa gibuhat ni Judas Iscariote sa pagbudhi niya kang Jesus Cristo. Wala sila nahibalo niini. Silang batan-ong mga lalaki wala nahibalo niana. Wala ko’y unsa man nga batok kanila—kanila nga mga batan-ong lalaki, mga kalalaken-an, ang espiritu man gud kini nga maoy nagasugyot nga buhaton kini.

126 Motikang lang kita og gamay paingon niining dapita, kung pasagdan lang kanang nagakatay nga sagbot nga molikos sa tipaka sa mais, usa ka higayon, tan-awa kung unsay mahitabo; mamatay kanang mais. Oh, oo, natuok na gyud siya niini. Ug sa ingon nianang paagi niya kini pagabuhaton. Pagabuhaton niya kini sa matag higayon. Usa ra ka paglili ngadto sa kalibutan ang gikinahanglan ni Eva kaniadto.

127 Ug aduna ko’y isulti kaninyo, igsoong lalake ug igsoong babaye. Sa Unang Juan, sa ika-2 nga kapitulo ug sa ika-15 nga bersekulo, mahimo natong basahon Kini kung gusto ninyo, ang Biblia nagaingon:

... *Kung* kita *nahigugma* sa *kalibutan*, o sa mga butang nga iya sa kalibutan, kini tungod kay *ang gugma* sa Dios *wala* man lang *dinhi* kanato.

128 Karon, ang pulong dinha dili *yuta*; apan kini usa ka Griyego nga pulong, nga *kosmos*, nga nagakahulogan “ang sistema sa kalibutan.” Kung nahigugma kita sa mga uso sa yuta, sa kalibutan, kung gihigugma nato ang mga urog sa panahon, kung atong gihunahuna nga “maanindot kini nga panahon, oh, anaa na kanato kining mga butanga,” kung ingon niana ang imong panghunahuna, tungod kana nga sayup ang imong pangisip. Gituis kini sa yawa. “Kay kon gihigugma ninyo ang sistema sa kalibutan, ug ang mga butang niining sa karon nga kalibutan, kini tungod kay ang gugma sa Dios wala diha kaninyo.” Hinumdumi kana. Oh Dios! Tan-awa gud ninyo kung unsa kining atong ginantan-aw!

129 Mohunong sa ko sa makadiyut ug aduna ko’y isugid sa inyo nga usa ka hamubong estorya. Aduna ko’y nadungog mahitungod sa usa ka kapilyan gikan niadtong Unang Gubat sa Pang-kalibutan. Naglabay sila . . .

130 Sama kang Satanas sa sinugdanan, sa dihang misulod siya sa tanaman sa Eden. Dili niya mahimong kaloton kadtong mga Binhi. Dili niya mahimong pamasyon kadto. Apan gi-espreyhan niya kini og hilo, ug nagpadaut kadto sa Binhi, wala na kini nakapamunga sa hustong matang niini. Gidaut niini ang orihinal nga Binhi.

¹³¹ Ug ingon niana pud ang tanan niining mga programa pang-relihiyon. Anak gihapon sila nga lalaki ug babaye sa Dios, apan nangabaliko na kini. Nagasimba man pud sila, gustong mamuhat og matarung. Wala man nagasulod ang madre sa kamadrehan aron mamahimong dautan nga babaye. Ang ministro wala pud naga-eskuwela aron mamahimong usa—usa—usa ka dautan nga tawo. Wala ka nagapamiyembro sa simbahan, ug nagapakiglamano, ug nagalista sa imong ngalan diha sa libro, o unsa man imong ginabuhat sa inyong iglesia, aron mamahimong dautan nga tawo. Ginabuhat mo kana aron mamahimong maayong tawo. Apan ang pagpanglimbong, ug ang pagpangtuis ang maoy nagapahimong mamaingon niini. Si Satanas ang nag-esprey niini. Kita n'yo? Ang Dios wala gayu'y organisasyon. Walay ingon niana nga butang nga makita bisan asa diha sa mga Pulong sa Dios.

¹³² Ang Dios mao ang atong organisasyon, naorganisa kita diha Kaniya, ingon nga usa ka Lawas, sa Dios, sa Langit. Husto kana. Ang atong mga ngalan nasulat na didto sa Basahon sa Kinabuhi nga iya sa Cordero. Himatikdi.

¹³³ Apan, kita n'yo, kabalo ko nga malisud gyud kini, apan ako—gusto kong magpabilin kamo og diyutay pa kung mahimo. Sa panahon niadtong gubat sa kalibutan... Pasayloa ko nga napahilayo ako sa akong hilisgotan.

¹³⁴ Pero aron mapatin-aw kini nga punto, ako—gusto kong ihatag kaninyo ang akong pag-analisar kung unsay gibuhat ni Satanas didto sa Eden: gi-esprey niya kadtong makalilisang nga hilo. Gusto ba ninyo mahibaloan kung unsa kadto nga esprey? Isulti ko kaninyo. Nakuha nako ang pormula niini, duha lang ka pulong: dili-pagtoo, nga kontra sa pagtoo, nang-esprey siya og dili-pagtoo, ug pagduhaduha. Ug ang siyensiya ang mipuli sa puwesto niini. Kung asa kadtong lungag, niadtong Binhi, gipuno kadto ni Satanas og kahibalo ug siyensiya ug sibilisasyon, ug gidaut niini ang kinatibuk-an, ug tanang binuhat sa Dios.

¹³⁵ Nasayod ko nga inyong gihunahuna nga ginabutang ko kamo sa makuyaw nga posisyon, apan anaa pud ako sa makuyaw nga posisyon kauban ninyo. Ug ania kitang tanan aron hibaloan kung unsa ang atong mahimo. Wala nato ginasulti kana nga mga butang para lamang malahi. Kinahanglan magmatinud-anon lang kita.

¹³⁶ Kita, ang matag usa kanato, modangat gayud ngadto sa kinatumyan sa atong panaw, diin kita manubag sa matag pulong. Sa karon, nasayod kita nga ang atong mga tingog... Sa dihang natawo kita, ang atong unang paghilak narekord na sa teyp. Ug ipatukar kini og balik sa Adlaw sa Paghukom. Bisang mga bisti nga imong ginasul-ob ipakita kini mismo sa imong atubangan, diha sa Adlaw sa Paghukom. Bisang gani ang siyensiya nakakaplag nga, pinaagi sa telebisyon. Kita n'yo,

apan ang telebisyon wala nagamugna og mga hulagway, kondili ginapaagi lang niini ang mga hulagway. Ang kolor sa mga sinina, ang matag lihok mo, ang matag hunahuna nga imong gihunahuna, siguradong nakarekord kana sa rekord sa Dios. Ug kanang dako nga butang igapakita mismo sa imong atubangan, ang matag mahilas nga mga bisti nga imong gisul-ob; ang matag higayon nga miadto ka sa alutanan, aron paputlan kanang buhok nga gihatag sa Dios kanimo. Kini igapakita gayud. Ug manubag ka alang niini. Dili ka makalihok didto, bisan ang mga panghunahuna sa imong kasingkasing samtang imong ginapangbuhat kadto, igapakita mismo sa imong atubangan. Unsaon nimo pag-ikyias niana? “Unsaon kaha nato pag-ikyias kung atong ginatalikdan ang ingon ka daku nga kaluwasan?” Kita n’yo? Dili gyud kita makaikyias. Ang matag lihok, ug ang mga panghunahuna sa kasingkasing, girekord mismo didto sa laing dimensyon, bisan ang kolor sa sinina nga imong gisul-ob. Ang telebisyon, ang dekolor nga telebisyon nagapamatuod nga tinuod gyud kini, nga ginasalida kini ug ginapakita kini, kita n’yo, ug kana usa lang ka dimensyon gikan sa tulo nga atong gikapuy-an. Kita n’yo?

¹³⁷ Karon miabot gyud ang maong hilo sa iglesia, miabot gyud sa yuta! Ang hilo ni Satanang mga Binhi, nagbutang og mga lungag sulod niini ug nagpahinungdan nga madaut kini. Palalum ug palalum, nga siya mitidlum ngadto sa kasingkasing sa mga iglesia, ug sa kasingkasing sa mga tawo ug sa tanantanang, siyensiya, og siyensiya na lang. Hangtud nga nahimo kining usa na ka kahimtang diin ang kaliwatan sa tawo, pinaagi sa pagpang-hybrid. . . Nagatoo ko nga ang matag binhi kinahanglan magpaliwat sa iyaha ra mismong matang. Ug ang kaliwatan sa tawo, ug ang mga pananum, ug ang tanan gipang-hybrid na, nga nagdala kanato ngadto sa usa ka kahimtang; nga ang ginakaon nato nga mga pagkaon gikan sa yuta, nga tungod niini, ang atong mga lawas, nahimo na pud nga hybrid, og gihimo niini ang atong tibuok pangisip. . . Karon, kung ang atong mga lawas nangadaut na, sugod sa edad nga baynte ngadto sa bayntesingko, tungod sa mga naut-ut na nga mga selula, tungod sa mga hybrid nga pagkaon, dili ba madaut pud ang atong mga selula sa utok? Dili ba mga selula, pud kana? Mao kana nga si Ricky nagapadagan og paspas kaayo diha sa dalan, uban sa iyang sakyanan; samtang sila Ricketta, Elvitta, ug daghan pa kanila, sumala sa tawag nato kanila, halos nangahubo na atubangan sa mga tawo, wala na sa pangisip, wala na’y panghunahuna kung unsa ang kaligdong o moralidad.

¹³⁸ Balik ta sa akong hamubo nga estorya. Kini nga kapilyan miingon nga miadto kono siya didto sa ospital, ug miingon nga daghan kaayong mga batan-ong lalaki ang nanaghigda na lang sulod sa tolda, ang uban. . . Bag-ohay pa siya gikan sa gawas. Ingon niya nga miadto siya didto, giingnan siya sa pipila ka mga

opisyales, miingon, “Kapilyan, gusto namong moadto didto, aron sutaon kadtong nataran.” Nangsabwag man gud sila og mustard ug chlorine gas, sama sa ilang ginabuhat kaniadtong mga adlaw.

¹³⁹ Ug miingon pa ang kapilyan, “Nakaadto ko didto, Igsoong Branham,” ingon pa, “wala na gyu’y nahabilin ni panit sa kahoy, wala man lang ni udlot sa sagbot. Buntag pa gyud kadto sa Pasko sa Pagkabanhaw.” Miingon siya, “Adunay pipila ka mga karaang guba na nga mga tangke-de-giyera didto, ug kinahanglan sa opisyales nga makakuha og rekord niini, ug tanawon kung aduna pa ba’y mahimo para kanila, duol kadto sa iladong Argonne Forest.” Ingon niya, “Kadtong nag-inusara lang ako nga nagtindog didto,” ingon pa, “mihangad ko, ug miingon, ‘Oh Dios, naingon-ani gyud ka grabe ang gisangputan niining tanan.’” Husto kana, mamaingon gyud niana ang sangputanan niining tanan. Nasunog ang tanan, wala na gyu’y nahabilin nga kinabuhi, nasunog apil ang mga sagbot; ang kahoy, tungod niadtong mga gas, nangamatay ang mga punoan, ang tanan-tanan nangamatay, nangabali, ug nagbitay na lang, kadtong mga naigo sa bala ug sa ingon-anang mga butang.

¹⁴⁰ Dili pa ba kana ang hulagway sa kalibutan karon, diin ginabwag ni Satanas ang iyang dili-pagtoo, ang iyang pagpang-hybrid, ang iyang siyensiya, ang iyang kahibalo! Hangtud nga, kung unsa man kini kaniadto sa sinugdanan, sa dihang gibutang sa Dios si Adan ug Eva sa tanaman, kadtong matahum nga paraiso kon diin walay kamatayon, walay sakit, walay kasubo, ug ang tanan anaa sa hingpit nga kahan-ayan, tan-awa kung unsa ang nahimo sa DDT ni Satanas! Usa na kini ka dakung kalamukat. Wala na’y bisan unsa nga nahabilin niini.

¹⁴¹ Miingon ang kapilyan, “Misugod ko sa paghilak. Ug paglakaw ko’g balik, namatikdan ko ang usa ka bato.” Miingon pa, “Miduol ko didto ug gitan-aw ko kining bato, ug gibaliskad kini. Ilalum diay niadtong bato adunay gamay nga puting bulak nga nagtubo, ang bugtong buhing butang didto nga nahibilin, tungod kay kini gitabonan sa usa ka bato.”

¹⁴² Dios, akong Bato, panalipdi kami karon, Oh Dios, sa diha nga kining mga hilo nagkuyanap na sa bisan asa sa ngalan sa siyensiya ug edukasyon. Panalipdi kami. Ampingi ako hangtud nianang adlaw, Oh Dios, mao ang akong pag-ampo. Karon ako nanghinaut nga kita, ang matag usa, napailalum nianang Bato, nga mao si Cristo.

¹⁴³ Bag-o lang ko nagwali sa miaging adlaw, daghan kaninyo ang nakadungog niini. Nagalakaw ako niadto latas sa mga kakahoyan, nangayam, ug aduna ko’y namatikdan mao nga milingi ako. Ug mitan-aw ko, ug didto adunay usa ka walay sulod nga karton o pakete sa sigarilyo, o unsa man ang inyong tawag niini. Ug kini nga kompanya, sa tan-aw ko dili ko angay’ng isulti ang ngalan niini, apan kining

kompanya sa tabako adunay . . . naa sila'y panultihon, “Salaan sa usa ka tawong nagahunahuna, panilaw sa usa ka tawong nagapanigarilyo.”

¹⁴⁴ Nagsige lang ko'g lakaw padulong sa—sa unahang gamay pa sa kakahoyan, ug May sa kung unsa nga mitawag sa akong pagtagad, “Baliki kadtong pakete sa sigarilyo.”

¹⁴⁵ Sa hunahuna ko, “Langitnong Amahan, paingon baya ko didto sa nianang kahoy kon diin Mo gisulti ang pagkatungha sa niadtong mga squirrel, usa niana ka buntag. Ngano mang tawgon ko Nimo pabalik?”

¹⁴⁶ Ug May sa kung unsa nga nagsulti, “Aduna ka'y sermon nga moabotay para sa Dominggo. Ang imong teksto nahisulat niini.”

Sa hunahuna ko, “Sa usa ka pakete sa sigarilyo?” Mibalik ko.

¹⁴⁷ Ug nagsugod ako sa paghunahuna, “Salaan sa usa ka tawong nagahunahuna,” pagkadakung limbong kana! Kung ang usa ka tawo nagahunahuna, dili gyud siya manigarilyo. Pero, nakita n'yo, gitoohan gihapon kana sa mga tawo.

¹⁴⁸ Nagtoo ko nga duha ka tuig na ang milabay, sa dihang didto ko sa usa sa mga konbensyon, miadto ko sa world's fair diin gipahigayon kini didto sa West Coast. Ug sila adunay litrato ni Yul Brynner ug daghan pa kanila didto. Ug ang mga siyentista, daghan kanila, atua usab sa samang tigumanan, nga nagahisgot bahin sa pagkapeligro sa pagpanigarilyo. Kung unsa nga ilang gihuypan og aso sa sigarilyo ang usa ka marmol, ug mikuha'g gamay'ng Q-tip ug gikuha ang nicotine didto ug gibutang kini sa likod sa ilaga, ug gisulod kadto sa hawla, ug sulod ra sa pito ka adlaw napuno na og kanser ang ilaga nga dili na kini makalakaw. Kita n'yo? Miingon siya . . . Gitangtang kini pinaagi og tubig, ug miingon, “Salaan!”

¹⁴⁹ Miingon, “Salaan? Walay ingon niana.” Ingon pa “Ikaw . . .” Karon, mismong ang siyensiya kini. Miingon sila, “Dili ka magkaaduna og aso gawas kung adunay alkitran. Kay tungod sa alkitran maong naay aso.”

¹⁵⁰ Ug ang tuyo man gud niini, usa ra kini ka gimik aron makabaligya og daghan pang mga sigarilyo, sa diha nga . . . Kung . . . Nanghinaut ko nga wala unta mo nagahunahuna nga matampalason ako o panatiko. Kanang yawa nga anaa sa usa ka tawo, maoy nagasugyot kaniya nga manigarilyo, aron patyon niya ang iyang kaugalingon. Sa dihang siya—magustohan na niya ang nicotine sa usa ka sigarilyo, mao kana ang mohatag kaniya og gana sa pagpanigarilyo, karon ania kining kompanya nga dala kining malimbongon nga gimik, ug moingon, “Salaan sa usa ka tawong nagahunahuna.” Kinahanglan niyang manigarilyo og upat o lima ka sigarilyo, aron makakuha siya og ingon ka daghang alkitran (aron matagbaw siya) sama sa makuha niya sa usa ka sigarilyo. Mga Amerikano nga

nagabaligya og kamatayon sa ilang mga igsoong lalaki ug igsoong babaye! Dili gyud nako kini masabtan.

¹⁵¹ Apan, bisan pa niana, sa hunahuna ko, “Aduna *gyu’y* tarung nga Salaan sa usa ka tawong nagahunahuna.”

¹⁵² Karon, kung ang usa ka tawo nagapanigarilyo, hinumdumi, nagahatag kana og pangtilaw diha sa usa ka tawo nga nagapanigarilyo. Dayon, kung dili mo ma...dili gyud matagbaw ang ingon niana nga panilaw sa sigarilyo gawas ra kung masinghot mo ang aso niini, makuha nimo... kinahanglan gyud nga matagbaw kana nga panilaw, mao nga, manigarilyo gyud ka og upat ka sigarilyo, o lima, ug mas mogasto ka’g dako para niini, kaysa kung manigarilyo lang ka’g usa ka sigarilyo. Kita n’yo, kini usa ka gimik, usa ka gimik sa pagpamaligya; pagpanglimbong sa mga tawo, sa mga Amerikano. Pagmahinumduman ko ang Valley Forge, si George Washington; nga uban ang duha-sa-tulo nga bahin sa iyang kasundalohan, walay sapin sa ilang mga tiil, niadtong matugnaw nga adlaw, aron lang nga makab-ot nato kining ekonomya nga aduna kita karon! Ug dayon baligyaan ra sa mga Amerikano ang isigka-Amerikano niya, ang iyang igsoong lalaki ug igsoong babaye, og kamatayon, ilalum nianang bakak nga gimik, aron lang nga makapanguwarta, nga mao ang gamut sa tanang kadautan. Ang pangibog sa kuwarta, ang gugma alang niini. Ang tanan nangabuang na, nga wala mahibalo nga kining tanan mahanaw lang! Apan kung wala ka’y makuhang aso, wala pud ka niana nga panilaw.

¹⁵³ Dayon sa hunahuna ko “Adunay *gyu’y* Salaan sa usa ka tawong nagahunahuna.” Salaan sa usa ka tawong nagahunahuna! Ug gikuha nako akong teksto gikan sa “Ang Salaan sa usa ka tawong nagahunahuna nagahatag og panilaw nga iya sa tawong balaan.”

¹⁵⁴ Busa sa hunahuna ko nga ang atong mga denominasyon nakahimo og mga ingon niana, nagapasulod og mga tawo nga nagapatawag sa ilang kaugalion nga mga Cristohanon nga bisan unsa lang ang pagkinabuhi. Ngano man? Para mas daghan ang mga miyembro sa ilang denominasyon o organisasyon. Mas daghan ang atong napamiyembro tungod kay gipasulod nato sila ilalum *niini*, *niana*, ug ang *uban* pa, ug bisan unsa na lang. “Wala kana naghatag og kalainan, basta lang nga malista ang ilang ngalan diha sa libro ug mag-angkon nga sila Cristohanon. Kana lang. Oh, ‘pinaagi ra man sa pagtoo nga naluwas ka.’ Kinahanglan mo lang nga motoo.” Ang yawa nagatoo pud nga sama niana. Oo.

¹⁵⁵ Kinahanglan kang matawo pag-usab, ug nagaabot lang kana pinaagi sa Salaan sa Dios! Karon kana ang Salaan sa usa ka tawong nagahunahuna. Ginagunitan ko Kini sa akong kamot. Dili Kini mohatag og denominasyong panilaw, apan

Kini magatagbaw gayud sa panilaw sa usa ka tawong balaan, kabalo mo.

¹⁵⁶ Unsaon man pag-agi sa mugbo'g buhok nga babaye sa niini nga Salaan? Unsaon man paagi Niini sa usa ka babayeng nagasul-ob og mga purol, o karsones, sa dihang ang Biblia nagaingon, "Kini usa ka dulumtanan sa Dios, alang sa usa ka babaye nga magsul-ob og bisti nga iya sa lalaki"? Ug mahimo ba diay sa usa ka lalaki kung tarung ang pagtan-aw niya sa iyang kaugalingon, nga mogawas ug magsul-ob og sama sa babaye, patas-on ang iyang buhok nga mora'g babaye, nga naa pa'y bangs, ubos sa iyang mata, ug pinakulong pa nga sama *niana*? Ginasul-ob niya ang pang-ilalum nga sapot sa iyang asawa. Ug ginasul-ob pud sa asawa ang pangawas nga sinina sa bana. Salaan ba kana sa usa ka tawong nagahunahuna? Ang lalaking nagahunahuna dili magabuhat og ingon-ana, o ang babayeng nagahunahuna dili pud magbuhat og ingon-ani. Dili gyud kana palusoton sa Pulong sa Dios.

¹⁵⁷ Wala ni usa ka butang ang makalusot nianang Pulong. Ang Balaang Espiritu kana, ug Kini nagapasulod sa Pulong nganha kanimo, ug Kini nagahatag og panilaw nga iya sa tawong balaan.

¹⁵⁸ Tan-awa karon, ang Ricketta nga anaa sa kadalanan, matahum, adunay maanindot nga lawas nga gihatag sa Dios ngadto sa babaye, ug gigamit kini ni Satanas. Ug siya magasinina og imoral kaayo, nga wala masayod nga sa mga usa ka semana gikan karon madugta na diay siya sulod sa lubnganan.

¹⁵⁹ Sa pagbiyahe ko sa dalan dili pa dugay kaniadto. Nagwali ko sa usa ka konbensiyon sa Assemblies of God didto sa West Coast, sa usa ka panagtigum sa Southwestern Bible School. Usa ka babaye ang nagalakaw sa dalan, gamay. . . nakasul-ob og mubo kaayong sinina, bikini, o unsa man ang inyong tawag niini, ug adunay borlas nga nagabitay, ug nagkalo og pang-cowboy ug naka-botas pa. Nagabiyahe ko niadto nga dalan. Sa hunahuna ko, "Luoy'ng batan-ong babaye, anak sa usa ka inahan ug amahan, nga gihimugso dinhi aron unta nga mamahimong anak sa Dios, ug nahimo na hinoon og panglit-ag sa yawa." Sa hunahuna ko, "Siguro motuyok na lang ko'g balik, ug sultihan kadtong bataa." Mora baya siya'g kaedad sa akoang Sarah, nga mga dise-siete, dise-sais anyos, o mga ingon niana. Sa hunahuna ko, "Dili, mas maayo nga dili na lang. Padayonon ko na lang ang pagbiyahe ug mag-ampo na lang alang kaniya. Kay basin naay makakita sa ako nga mihunong ug nakig-estorya sa iya, mas maayo nga dili na lang."

¹⁶⁰ Karon, ug paminaw kamo, mga anak sa Dios, pagmaanaa kamo sa samang kahimtang, nga kining mga Jezebel sa atong panahon magatintal kaninyo, apan ang usa ka tawong

nagahunahuna mamalandong gyud una. Mahimong maanyag kaayo siya, mahimo nga “siguro puede ko manguyab sa iyaha,” apan baylo kini sa imong kalag, dong; ug kamo pud nga mga dalaga, sa niining mga Ricky! Ang Salaan sa usa ka tawong nagahunahuna nagahatag og panilaw nga iya sa balaang tawo.

¹⁶¹ Kamong minyo na nga mga lalaki, pagmakita ninyo sila nga mga babaye diha sa dalan nga ingon niana, kamo nga mga anak sa Dios, wala ba ninyo naamgo kung unsa ang nahitabo niadtong unang sinugdanan? Sa diha nga ang siyensya gihimo og matahum kaayo ang mga babaye kaniadtong wala pa ang paglunop sa kalibutan, hangtud nga ang mga anak nga lalake sa Dios mikuha og mga anak nga babaye sa mga tawo (dili mga anak nga babaye sa Dios), ug ang Dios wala gyud nakalimot niadto. Ilang gidaut ang maong tibuok butang; tungod sa siyensiya, nangahimong mas matahum. Kaniadto . . . Matikdan ninyo ang katahum sa mga babaye nga misamot pa sa katapusang mga adlaw, usa kini ka ilhanan sa katapusan; napamatud-an na kini sa Dios. Busa, gamita kining Salaan sa usa ka tawong nagahunahuna, aron makabaton ka og panilaw nga iya sa tawong balaan. Baylo niini ang imong panimalay. Baylo niini ang imong posisyon. Baylo niini ang tanan nga aduna ka; ug wala pa’y labot niana, ang imong kalag! Gub-on niini imong panimalay. Mahimong ubang lalaki na ang magpadako sa imong mga anak, o ubang babaye na ang magpadako sa imong mga anak.

¹⁶² Gamita kanang Salaan sa usa ka tawong nagahunahuna, ug kini magahatag og panilaw nga iya sa balaang babaye. Paadto ka pa lang sa alutanan, o butang nga sama niana, kay niingon sila sa imo nga, “Kabalo ka, magpalabad gyud kana sa imong ulo.” Gamita ang Salaan sa babaye nga nagahunahuna, kung unsa ang giingon sa Biblia, kita n’yo, dayon talikdi kana. Kita n’yo? Ayaw gyud kana buhata.

¹⁶³ Igsoon ko ninyo, ug gihigugma ko kamo. Wala ko’y bisan unsa nga batok kaninyo. Ang Dios nahibalo. Ug mao kana ang nakapasulti kanako sa mga butang nga akong gisulti, tungod sa—sa gugma sa Dios alang kaninyo. Kung ang usa ka tawo moadto didto ug dili man lang sila mosulti kanimo, ug pasagdaan ka sa imong pastor nga maglingkod-lingkod lang ug molihok nga sama niana, nan wala siya nahigugma kanimo. Wala ka niya gihigugma. Dili ko ganahan nianang klase nga gugma alang sa kababayan-an. Gusto kong aduna ko’y balaan nga pagtagad alang sa akong igsoong babaye. Gusto ko nga mamahimo siyang tinuod gyud nga akong igsoon. Ug dili kanang mosulti, o maghisgot kung unsa siya kaanyag ug kung unsa siya, ug maghisgot niadtong mga sex queen, “Nagaanha baya siya sa akoang . . .” Huh-uh. Dili. Ang gusto ko kaniya nga mamahimong maligdong nga gining!

¹⁶⁴ Oh Ginoo, ipapabilin akong ilalum nianang Bato. Oo. Sa Mga

Taga-Efeso 5:26, ang bugtong paagi nga makaduol ka nianang Bato, mao ang, “Mahinloan usá sa tubig sa pagkabinulag pinaagi sa Pulong.” Husto kana.

¹⁶⁵ Karon, ayaw pasagdi nga ma-espreyhan kamo sa yawa sa iyang edukasyon. Ayaw, ayaw. Patyon niini ang inyong impluwensya. Ayaw itugot nga magamit sa yawa kanang, “Bueno, sakop man ko sa iglesia kung asa nahisakop ang akong inahan, kung asa akong amahan, ug akong lola.” Ayaw itugot nga ma-espreyhan kamo sa yawa og ingon niana. Ang Biblia nag-ingon na daan, bahin sa Pito ka mga Kapanahonan sa Iglesia, ug ang mga butang kaniadto, nga mipaingon na kining tanan sa binhi! Husto kana. Ang maong tibuok butang nahimo nang daut. Ang maong tibuok butang nahimo nang ginana nga samad. Ayaw tugoti nga ma-espreyhan niya kamo, moingon, “Bueno, mas hataas kini nga etiko. Mas edukado na kita karon kaysa sa kaniadto.” Ayaw gayud itugot nga maibutang kana sa yawa sa ibabaw n’yo. Gipakita na nako kaninyo ang iyang tibuok programa sa mahitungod sa sibilisasyon, edukasyon ug siyensiya. Iya na kining naipasulod sa iglesia, ug ayaw gyud niinyo patalinghugi kana. Ilikay gyud ang inyong ulo gikan nianang karaan og mahugaw nga telebisyon ug ingon-anang mga butang!

¹⁶⁶ Ug ang atong teksto nagaingon, “Ayaw kamo pagpahiuyon, kondili pag-usab kamo.” Ayaw pagsulod ug moingon, “Nakumpirma na ko, niadtong Dominggo.” Ayaw. Pagsulod ug magpabag-o karon mismo, nga mabag-o gikan sa kung unsa ka, ngadto sa kung unsa ang gusto sa Dios nga mamahimo ka.

¹⁶⁷ Karon, depende kini kung unsang klase nga binhi ang anaa kanimo. Kung usa ka intelektuwal, edukasyonal nga binhi ang nabutang diha kanimo, adunay usa ra ka butang ang mahimo niini, ang baliko-on ka, kana lang, gikan sa pagka-anak nga lalaki o anak nga babaye sa Dios. Mao lang kini ang mahimo niini. Ang mga tawo sa karon, sa akong paniid, nagapanglihok nga daw wala sila nagatoo nga adunay Dios.

¹⁶⁸ Pasayloa n’yo ako niining panultihon. Kung nasakitan ang pagbati ni kinsa man tungod niini, wala ko kini tuyoa. Mga duha ka Dominggo ang milabay gidapit ako, sa akong anak nga babaye, nga moapil og tan-aw sa telebisyon ug aron makita kadtong relihiyosong mga pag-awit. Dominggo kadto sa buntag. Gusto man gud nako madungog si Oral Roberts diha sa iyang programa, maong giingnan nako sila nga pahibaloon ko. Miingon, “Paminawa kini, maayo kaayo kini nga pagkanta sa himno.” Akong anak nga lalaki nga atua didto, giestoryahan pud ko, mahitungod niini. Ug akong gipakusgan kadtong. . .

¹⁶⁹ Nag-abang pa kami niadto sa usa ka babaye nga adunay telebisyon sa iyang balay. Wala gyud ko magtinguha nga adunay ingon-ana sa akong balay. Wala, sir. Dili ko gusto nianang

butanga sa sulod sa akong balay. Pusilon ko gyud kini sa akong shotgun. Dili ko gustong adunay kahilambigitan nianang dautan nga butang. Dili, sir! Pero mikuha og usa ka . . .

¹⁷⁰ Aduna ko'y isulti sa inyo nga mga taga-Arizona dinhi. Nakita na ninyo kadtong pagtuki sa miaging adlaw, nga may kalabutan sa mga eskwelahan, dili ba? Otsenta porsyento kono sa mga bata sa mga eskwelahan sa Arizona adunay problema sa pangisip, saysentay-siete ka porsyento niini maoy tungod sa pagtan-aw sa telebisyon. Unsaon na lang kana?

¹⁷¹ Mas maayong gamiton n'yo na ang inyong shotgun! Kita n'yo? Karon, ayaw itugot nga espreyhan kamo sa yawa og ingon niana. Ayaw, sir. Karon ang mga tawo, sumala sa akong giingon, ang mga tawo nagapanglihok nga daw sa dili sila kinahanglan moatubang sa Paghukom.

¹⁷² Kadtong mga batan-ong lalaki ug babaye, aduna sila'y pipila ka Indian nga pamilya, ug daghan kaayo sila'y mga butang. Sa tan-aw ko gipangulohan kini sa usa ka tawo nga ginganla'g Mr. Pool. Ug kung duna man ako nakita nga modernong pagbiaybiay sa mga himno, mao na kadtong ilang pag-awit niadto; usa ka pundok sa mga Ricky ang nanagtindog didto, nga nagwarawara sa ilang mga kamot.

¹⁷³ Ganahan gyud ko niadtong batan-ong lalaki dinhi karong buntaga, nga mikanta, disente tan-awon, sama sa tinuod gyud nga lalaki. Ako—ganahan ko niana. Sa dihang kamo—kamong mga negosyante usahay dinhi mokuha'g usa ka pundok niining mga Ricky nga patindogon dinhi, ug magsinggit ug magpataniis, ug kung unsa na lang ang buhaton, ug mag-utug sila handtud nga mangluspada na lang ilang nawong; ug dili man ingon niana ang pag-awit, kana'y paghimo ra man og siyentipikanhong kasaba. Ang *pagkanta* “tono gikan sa kasingkasing.”

¹⁷⁴ Ug sa hunahuna ko, “Luoy kaayo! Makauulaw gayud! Naunsa nga ilalum man kaha sa ngalan sa relihiyon, unya nagapanglihok sila nga daw walay Dios!” Adunay miingon, niadtong miaging adlaw, ngadto sa usa ka batan-ong lalaki nga nagapangulitawo sa akong anak nga babaye, miingon kadtong Cristohanong batan-ong lalaki, naghatag siya'g maigmat nga komento mahitungod kang Adan ug Eva, miingon, “Si Eva nga miagi didto sa tanaman. Miingon, ‘Mga anak, nakita ba ninyo kanang kahoya dinha?’ Miingon, ‘Dinha mikaon ang inyong inahan nga nagpalayas kanato sa balay ug panimalay.’” Mahunahuna ba ninyo, gitoohan pa man unta siya nga usa ka malig-on nga Cristohanon, nga ginapakawalay bili ang saad ug ang Pulong sa Dios ug ilabay ra kini ngadto sa tangkal sa baboy! Nagapanglihok sila nga daw sa dili na sila moatubang sa Paghukom. Apan pagadalhon sa Dios ang matag tinago ngadto sa Paghukom. Nagapanglihok sila nga mora'g wala'y Dios.

175 Dili ko gustong tawgon sila nga buangbuang, tungod kay miingon ang Biblia nga ang buangbuang . . . dili husto. Si Jesus miingon nga dili kana husto. “Ayaw tawga ang bisan kinsang tawo nga buangbuang.” Apan diha sa Mga Salmo 14:1, “Ang buang diha sa iyang kasingkasing miingon, ‘Walay Dios.’” Kita n’yo? Sila—dili man sila . . . Dili ko gusto nga tawgon sila nga mga buangbuang, apan nagapanglihok sila sama sa buangbuang. Nagapanglihok sila nga daw sa ingon niana.

176 Busa, nakita n’yo kung asa na kita karon, sama na sa, “Walay Dios.” “Miyembro ko sa iglesia!” Apan silang tanan, ang tibuok butang, ang Biblia, daw usa na ka dakung komedya. “Ang among iglesia nahibalo kung asa sila paingon!” Oo . . . [Blanko nga bahin sa teyp—Ed.] . . . diretso sa impyerno, eksakto. Paingon na sila mismo didto, tungod mismo sa siyensiya ug edukasyon, pang-teologong mga seminaryo ug ingon-anang mga butang, nga ginapaagpas sila paingon sa ilang padulnganan. Mao nga wala na’y kahigayonan ang Balaang Espiritu nga maghatag ug kapadayagan mahitungod sa bisan unsa; kay human nang giputol kana sa seminaryo.

177 Ang Balaang Espiritu maoy mogiya kanato; dili ang seminaryo, dili ang mga opisbo ug mga tigdumala, ug uban pa. Ang Espiritu Santo ang maoy atong Lider.

178 Ingon niana nga klaseng tawo si Cain. Relihiyoso kaayo siya sa buhat. Karon, kung ang relihiyon mao lang ang kinahanglan nimong maangkon, nan dili diay matarung ang Dios tungod sa pagkondena kang Cain. Tungod kay, siya relihiyoso, ingon niana siya karelihiyoso ug sinsero sama kang Abel. Karon hinumdumi, naghunahuna siya sa Dios, iyang gisimba ang Dios, aduna siya’y simbahan, nagtukod siya og altar, naghimo siya og halad, nag-ampo siya, misimba siya, apan wala siya gidawat. Bisa’g unsaon gyud . . . Si Esau, ingon niana pud. Kita n’yo?

179 Ang relihiyon, kita n’yo, mao kana ang buluhaton ni Satanas; dili aron patyon ang maong tibuok butang, kondili hugawan lang kini. Mao lang kana. Dili niya pagapatyon ang maong tibuok butang. Oh, dili ang mga komunista; dili, dili, ang anticristo dili komunismo. Ang Biblia nag-ingon, “Iyang pagalimbongan bisan ang mga Pinili kung mahimo.” Ayaw tagda kanang puthaw nga tabil, kondili kanang purpora. Uh-huh.

180 Apan, matikdi, mianha pud si Cain aron magsimba, apan sayop nga binhi ang anaa sa iya, binhi sa serpente. Ang sitsit sa serpente misitsit diha kaniya, tungod kay kaliwat siya sa babaye. Nasayod siya sa hingpit nga kabubut-on sa Dios, apan nagdumili siya sa pagbuhat niini. Nahibalo ba kamo niana? Nahibalo si Satanas sa kabubut-on sa Dios, apan nagdumili ra gyud sa pagbuhat niini.

181 Matikdi, nakita niya nga gipanghimatud-an sa Dios ang mensahe ni Abel. Karon gusto kong maghunahuna kamo, gamita

karon ang inyong Salaan sa usa ka tawong nagahunahuna sa makadiyut. Ang tukma nga mensahe ni Abel, nga gipamatud-an sa Dios nga mao ang Kamatuoran! Nasundan na ba ninyo karon? Uh-huh. Gidawat ang mensahe ni Abel, ug nakita kadto ni Cain ug nasayran niya nga gipanghimatud-an kadto sa Dios ingon nga husto nga mensahe. Apan dili niya gayud kadto mahimo. Ang iyang garbo ang nagpahilayo kaniya gikan niini. Husto kana, ang iyang garbo ang nagpugong kaniya sa pagbuhat niini. Bisan nga nakita niya nga gipamatud-an sa Dios ang maong mensahe.

¹⁸² Mora'g mao sa gihapon karon, malisud na kaayo para sa mga tawo nga magpaubos sa ilang kaugalingon ngadto sa Pulong sa Dios. Sila—sila—dili lang gyud nila gustong buhaton kini. Ipaubos nila hinoon ang ilang kaugalingon ngadto sa kredo sa iglesia, sigurado kana, apan dili sa Pulong sa Dios.

¹⁸³ Kung gusto ninyo pangitaon kini, adto mo sa . . . Aduna ko'y usa ka Kasulatan dinhi, mao kana ang akong ginapahinungdan dinhi. Genesis 4:6 ug 7, ang Dios miingon kang Cain, miingon, "Nganong nagngil-ad ang imong panagway? Nganong puno ka man sa kasuko, nga nagalakaw-lakaw? Bag-o lang nimo nadungog ang mensahe nga nakapasilo kanimo." Miingon, "Bueno, nganong ginabuhat man nimo kana? Nganong nagngil-ad man ang imong panagway, tungod ba kay wala Ko miduaw sa imong simbahan? Busa nganong gibuhat man nimo kadto?"

Gigamit ba nimo ang Salaan sa usa ka tawong nagahunahuna? Kita n'yo?

¹⁸⁴ O, "Ngano wala . . . Nganong ingon-ana man imong panagway?" Miingon pa, "Kung maayo ang imong pagabuhaton, sige buhata kana sama sa gibuhat sa imong igsoon didto, dawaton Ko ikaw ug panalanginan ka. Buhaton Ko usab alang kanimo ang parehas nga butang." Apan dili gyud niya kadto mahimo. Ang ingon Niya, "Karon, kung magdumili ka, ang sala nga dili-pagtoo naghulat na sa pultahan."

¹⁸⁵ Karon pagmoingon sila kanato, "Ang mga adlaw sa mga milagro milabay na," apan nakita nila nga hingpit kining gipanghimatud-an ug gipamatud-an, nakita n'yo, kining tanang mga butang nga gisaad sa Dios nga Iyang pagabuhaton sa katapusang mga adlaw, sa Pinadayag 10 ug Malaquias 4, kanang tanang mga butanga hingpit gayud nga gipanghimatud-an, unsa ma'y nahitabo, mga igsoon? Unsa ma'y problema, kita n'yo?

¹⁸⁶ Kung ayaw nila, ang dili-pagtoo, nga mao ang sala . . . Adunay usa lamang ka sala, kana ang, dili-pagtoo. Husto kana. Wala ka gikondena tungod kay nagainom ka og makahubog, nagapanigarilyo, nagamama, nagasul-ob og mga purol, ginabuhat kung unsa man ang imong ginabuhat. Dili, dili kana ang nagapakondena kanimo. Kini tungod kay wala ka nagatoo. Kay kung ningtoo ka, dili nimo kana buhaton. Kita n'yo? Ang usa ka magtotoo wala nagabuhat niana. Gamiton niya

ang Salaan sa usa ka tawong nagahunahuna, kita n'yo, kita n'yo, o ang Salaan sa usa ka nagahunahuna nga babaye, bisan asa niana. Bueno. Apan, nakita n'yo, ang sala naghulat na sa ganghaan.

¹⁸⁷ Karon matikdi kung unsa ang nahimo niadto kang Cain, ug mamahimong ingon niana pud karon. Mao kadto ang hinungdan nga nagpalayo si Cain, nga makakasala sa kinabubut-on. Kinabubut-on siya nga masupilon. Mamahimong ingon niana pud ang matag tawo. Tinuyo niya nga magmasupilon bisan pa nga nakita niya ang mensahe ni Abel nga gipanghimatud-an gayud sa Dios, nga mao kadto ang kamatuoran, ug nagdumili gihapon siya nga buhaton kadto. Gihimo niya ang mao mismong butang kaniadto. Mao nga nalabang niya ang utlanan nga nagapahimulag.

¹⁸⁸ Adunay utlanan nga mahimo n'yong labangon. Nasayod kamo niana, dili ba? Karon, mga ministro, dinhi ug kadtong mga—mga nakakonekta sa telepono nga maabot niini nga sibya sa tibuok nasud, naamgo ba ninyo kana? Sa dihang makita ninyo kini nga tukma sa Kasulatan, ug dili ninyo kini buhaton, ang Dios dili kanunay. . . Siya. . . Oh, makapadayon man mo, ug pagapanalanginan gihapon. Pareho ra kini sa matag tawo sa Israel kaniadto, nanagpuyo sila didto sa kamingawan, gipadako ang ilang mga anak, ug nag-uma, ug gipanalanginan, ug tanan na, apan “ang matag usa kanila Eternal nga nahimulag gikan sa Dios.” Mao kana ang gisulti ni Jesus. Oh, oo, panalanginan ka gihapon sa Dios, apan nahimulag na ka. Sigurado. Mao kana ang ginaingon sa Biblia karon, mao kana ang Iyang gisulti. Matikdi, mahimo mong tabukon ang utlanan nga nagapahimulag. Nagatoo ba kamo niana? Gibuhat ni Cain kaniadto.

¹⁸⁹ Kita—mag-abli usà kita dinhi sa makadiyut, aduna ako sa Mga Hebreohanon 10:26. Atong tan-awon kung makita ba nako kana dayon. Ang Basahon sa Mga Hebreohanon, ang ika-10 nga kapitulo ug ang . . . sa pagtoo ko, sa ika-26 nga bersekulo. Akong gisulat kini dinhi. Kadiyut lang, kung inyo kong tugotan, ug ato Kining basahon sa makadiyut. Sige, ania na ta.

*Kay kong magpakasala kita sa tinuyo sa human ta . . .
madawat ang pag-ila sa kamatuoran, wala nay halad
tungod sa sala,*

*Apan usa ka makalilisang nga paghulat sa paghukom
ug ang kabangis sa kalayo, nga magalamoy sa kaaway.*

¹⁹⁰ Kana ang MAO KINI ANG GINAINGON SA BALAANG PULONG SA DIOS. Kung tinuyo nga dili kita motoo human nga atong nakita Kini ug nadungog Kini, nan natabok nato ang utlanan. Wala na'y kapasayloan niini, natabok na nimo ang maong utlanan.

“Oh,” moingon ka, “gipanalanginan man lagi gihapon ko sa Dios.” Oh, oo.

¹⁹¹ Hinumdumi ang Israel kaniadto, ang mga *tawong-hangtud-utlanan-lang*, kaniadtong ang Dios naghatag kanila og usa ka saad, didto sa Balaan nga Yuta, ang . . . didto sa yuta, nga puno kadto, og gatas ug dugos, ug sa diha nga gipadala ni Moises si Caleb ug si Josue, ug ang mga espiya, aron adtoon, ug maniid sa maong yuta didto, ug gidala pabalik ang gipanghimatud-an nga ebidensya, ang napulo kanila miingon, “Dili nato kini mahimo, dili nato arang mahimo, tan-awa ang kalisud didto, mamahimo lang kitang mga panatiko, gagmay lang nga mga butang ang aduna kanato nga magamit sa pagpakiggubat, tan-awa kung unsa ang ana sa ila, kita—dili gyud nato mahimo kini, wala ta’y kasarang sa pagbuhat niini.”

¹⁹² Miingon si Josue ug Caleb, “Labi pang may kasarang kita nga buhaton kini, tungod kay ang Dios man ang nagsaad.”

¹⁹³ Ug, hinumdumi, mingbalik sila. Didto kini sa Kadesh-barnea. Ug mingbalik sila ug nahimong latagaw didto sa kamingawan. Ug ang matag usa kanila nangamatay, ug nangalaglag sa Walay Katapusan. Mao kana ang gisulti ni Jesus.

¹⁹⁴ Ayaw gayud taboka kanang utlanan nga nagapahimulag, kita n’yo. “Kung nasayod ikaw sa pagbuhat sa maayo, apan wala kini buhata, sala kini kanimo.”

¹⁹⁵ Mao usab ang gibuhat kaniadto sa Israel. Human nila makita si Moises nga gipanghimatud-an, ug bisan pa niana gitugotan nila nga ma-espreyhan ni Balaam, kadtong bilihong gipanghimatud-an nga Binhi. Pastor, ayaw (gayud) pagsulti og unsa man nga batok niining Pulong. Tan-awa si Balaam, usa siya ka propeta, ug nakita niya ang Binhi sa Dios nga gipanghimatud-an. Apan ilalum sa iyang kaugalingong daku nga denominasyon nga iyang gipasilungan, nakita sa Moab kadtong pundok sa mga libudsuroy nga nagaagi sa ilang yuta, iya kining gi-espreyhan, ug miingon, “Bueno, kadali lang. Cristohanon man kitang tanan. Kitang tanan nga magtotoo. Aba, ang among mga ginikanan ug inyong mga ginikanan pareho ra. Dili ba mga kaliwatan kami ni Lot? Dili ba pag-umangkon man si Lot ni Abraham? Dili ba kitang tanan managsama ra? Busa managminyo kita sa usa’g usa.”

¹⁹⁶ Ug ang Israel, sama ni Eva kaniadto sa tanaman sa Eden, nga gitugotan si Satanas nga ma-espreyhan siya, gi-espreyhan pud ni Satanas ang Israel pinaagi sa usa ka mini nga propeta. Nga sa maong panahon, kauban nila ang tinuod nga propeta, nga dala ang gipanghimatud-an nga Pulong. Apan pinaagi sa intelektuwal nga panghunahuna sa kahibalo, iya silang gi-espreyhan. Hunahunaa n’yo kini. Karon, wala gyud kadto gipasaylo, wala gyud napasaylo ang maong sala.

¹⁹⁷ Nangadunot ang mga binhi diha mismo sa dalan sa pangatungdanan, diha sa dalan paingon sa yutang saad. Ang matag usa kanila nangamatay ug nangadugta, didto mismo sa iglesia, diha sa linya sa pangatungdanan, nga nagasunod sa Dios. Ug gitugotan nila si Satanas nga isabwag diha kanila kadtong intelektwal nga esprey, pang-edukasyon, intelektwal nga mga panghunahuna, og moingon, “Aba, managsama ra kitang tanan, mga anak kitang tanan sa Dios.” Kamo ang dili! Apan iyang gitugotan kadtong mini nga magtutudlo didto nga ma-espreyhan sila niadtong intelektwal nga panghunahuna nga aduna siya mahitungod Niini.

¹⁹⁸ Ug sama sa ginabuhay karon sa Ecumenical Council, kita n’yo, parehas ra nga butang, “Aba, maghiusa kitang tanan diha sa usa ka dakung organisasyon.” Ang inyong tibuok sistema sa organisasyon iya sa yawa. Kini mao ang marka sa mapintas nga mananap, diha sa Biblia. Hapit na ko, magkaadunay basahon mahitungod niini, kon itugot sa Ginoo.

¹⁹⁹ Matikdi, sa panahon ni Noe kaniadto, makita nato ang Pulong nga gitukod, aron molutaw. Karon tugoti ako nga maghimo og hamubo nga paghisgot dinhi, ang Pulong nga ginatukod kaniadto sa katuyoan nga kini molutaw gikan sa yuta ngadto sa kalangitan. Ilang nakita ang pagkatukod niadtong butanga; apan tungod sa ilang intelektwal nga mga panghunahuna, nangatawa lang sila sa atubangan sa propeta, nga si Noe, sa dihang ginapropesiya niya ang mahitungod sa katapusang panahon kaniadto. Apan unsay gibuhay . . . Kadtong butang nga gitukod gihimo pinaagi sa Pulong sa Dios, gibulitan kadto sa sulod ug gawas, pinaagi og pag-ampo ug pagtoo. Sa dihang miabot na ang ulan, ang tanang mga intelektwal nga panghunahuna sa mga relihiyon nangamatay ug nangadugta didto mismo sa . . . diha mismo sa ilang mga iglesia, dinhi mismo sa yuta. Ug ang arka naglutaw sa ibabaw niining tanan. Ang binhi nga siyentipikanhong sinabligan nadunot diha sa maong paghukom.

²⁰⁰ Unsa pa man atong gipaningkamutan nga buhaton, diay? Ang ginapaningkamotan ba nato mao ang pagtukod sa atong iglesia o ang ginapaningkamotan nato mao ang pagtukod sa Pulong sa Dios? Unsa ba gyud ang ginapaningkamotan natong buhaton? Unsa ba gyud ang atong ginapaninguha? Nagapaningkamot ba kita nga maibalik ang mga tawo ngadto Niini? Unsa ba gyud ang ginatinguha nga buhaton niining dakung Eva sa niining katapusang mga adlaw, kining iglesiang Eva?

²⁰¹ Kinahanglan ko nang moundang, igsoon, tungod kay—halos hapon na. Hatagi lang ko ug mga kinse ka minuto pa, ug mohunong na ako sa akong—akong mga Kasulatan dinhi. [Nagaingon ang igsoong lalaki, “Sige, padayon lang.”—Ed.] Oo. Sige. Kabalo ko. Bueno, gusto na tingali sa mga tawo nga

mosulod ug limpyohon na kini. Pero mora'g maglisud gyud ko og undang. Dalion lang nako. Sige.

²⁰² Tan-awa n'yo, kining bantugang siyentipiko, pang-edukasyon, nga hybrid nga Eva karon, nga gitawag og iglesia, unsa man ang iyang ginapaningkamotan nga buhaton? Gapaninguha ba siya nga ituboy ang Pulong sa Dios, ug pasagdan lang ang mga tao nga mopadayon kung unsa ilang ginabuhat? Wala nila gigamit ang Salaan sa usa ka tawong nagahunahuna, o, ang Salaan sa Dios. Tan-awa kung unsa ang ilang ginapamunga. Ilang ginatuboy ang ilang kaugalingon. Ang iglesia, diha sa iyang hiwi nga binhi sa programa pang-kahibalo, nagpahinungdan sa tibuok kaliwatan nga mahimong siyentipikanhong walay-hibangkaagan sa Pulong sa Dios. Karon akong ipahayag kini nga mga punto, dili na ako magdugay niana nga bahin karon, aron mahuman na kita. Siyentipikanhong walay-hibangkaagan! Sa diha ang Dios, dinhi mismo sa yuta, ginabuhat ang mga butang nga Iyang ginabuhat, pinaagi sa Iyang gisaad nga Pulong, ug ila Kining ginabaliwala ug layoan tungod kay sila siyentipikanhong walay-hibangkaagan. Siyentipikanhong walay-hibangkaagan!

²⁰³ Nakapahiyom ko tungod kang Igsoong lalaking Williams dinhi, nga nagsulat dinhi sa usa ka papel, "Mahimo kang magdugay dinha bisan pa og tibuok hapon," ingon-ana. Apan, ginapasalamatan ko kana, maayo gyud kana. Kita n'yo?

²⁰⁴ Apan ang mga tawo—ginatuyo nilang magpakasala. Ginadala niini ang—ang tibuok sistema sa mga kaiglesihan sa karon ngadto sa tinuyo nga pagpakasala batok sa Dios. Aba, bisan ang yanong kaligdong makapagpamatuod kaninyo nga husto Kini. Oo. Ang tabil sa kailibgon ang nagbuta sa iyang mga mata, ngadto sa Pulong sa Dios, ug nahikaplagan niya ang iyang kaugalingon nga hubo na usab. Kabalo mo, ang Dios, diha sa Pinadayag 3, miingon, "Umari ka, pagpalit gikan Kanako og tambal, aron maabli ang imong mga mata." Kita n'yo, ang Tambal nga ikapadapat sa mata mao ang Iyang Pulong.

²⁰⁵ Kabalo mo, moingon sila, "Bueno, kining tawhana nagtoon baya og kuwarenta ka tuig, aron makuha ang iyang mga digri. Usa siya ka B.L.D., D.D., ug tanan na niini."

²⁰⁶ Nahibalo ba mo kung unsa ang gisulti ni Jesus bahin niana? Miingon siya, "Kinahanglan ang tawo magdumili siya sa iyang kaugalingon." Mao kana ang gibuhat ni Pablo.

Moingon ka, "Dili man ingon niana ang pasabot niana."

²⁰⁷ Bueno, nganong gipasundan man ni Pablo kadto, kung ingon-ana? Ingon niya, "Wala ako sukad mianha kaninyo sa madanihong mga pulong sa kaalam nga iya sa tawo, tungod kay basin ikapatukod ninyo ang inyong mga paglaum diha niana. Apan mianha ako kaninyo diha sa gahum ug mga pagpadayag sa Espiritu Santo, aron ang inyong pulong. . . ang inyong pagtoo

ikapatukod diha sa Pulong sa Dios, dili sa mga pagpasundayag sa kaalam.”

²⁰⁸ Mora og nawad-an na gyud ang mga tao og igong kaligdong ug kaugdang. Dili na sila sama kaniadto. Kaniadto, sa dihang ang propeta moingon, “MAO KINI ANG GINAINGON SA GINOO,” mangurog ang mga tawo. Oo, mangurog gyud sila kaniadto. Mangatay-og gyud ang mga tawo, tungod kay sila nangahadlok. Apan karon nawala na ang tanan nilang kahadlok Niini. Wala na sila mahadlok sa Dios.

²⁰⁹ Si Solomon miingon, “Ang—ang kahadlok sa Dios mao ang sinugdang sa kaalam,” ang sinugdanan niini.

²¹⁰ Apan pagmosulti ang propeta og MAO KINI ANG GINAINGON SA GINOO, ang mga tawo moingon, “Binuang!” Kita n’yo, wala na’y paglaum alang kanila. Kini, ang ilang ginaingon, “Aba, manggialamon kami. Mga intelektuwal kami, dili namo kinahanglan ang ingon-ana nga mga butang! Nahibalo kami sa among ginasulti!”

²¹¹ Usa usab kini ka karaang panultihon, nga, “Ang mga buangbuang lang ang motunob nga nagsul-ob og mga sapatos nga nilansangan ang suyulas, diin ang mga Manulonda nahadlok nga motunob.” Mao gayud.

²¹² Karon, unsa ang pagbag-o? (Dali.) Unsaon nato pagkuha niini? Unsa ang ginabuhat sa pagbag-o? Ginabuhat kini sa Dios pinaagi sa Espiritu sa Iyang Pulong. Siya nagabag-o. Iyang ginatanum ang Iyang Binhi, dayon ibubo ang Iyang Espiritu Niini, ug Kini magapatubo og produkto. Ginausab sa Iyang Balaang Espiritu ang Binhing Pulong aron mapanghimatud-an ang Iyang kaugalingong matang.

²¹³ Kung unsang klase ka nga binhi, nagapakita kana kung unsa ang sulod nimo. Dili nimo kana maililong. Kung unsa ang anaa sa imong sulod, kini makita sa gawas. Dili nimo kini mapugngan. Dili nimo mahimong buhaton nga lahi kanang kahoya gawas ra gyud sa kung unsa kini. Kita n’yo, kini—kini mamahimong ingon niana gayud. Ginapatubo sa Balaang Espiritu ang mga binhi nga mamahimo sa kung unsa ra gyud ang anaa sa sulod niini. Bisan unsa pa nga klaseng binhi kini, himoon siya Niini kung unsa ra gyud kini. Kung dautan kini, motubo kining dautan. Kung kini usa ka tigpakaaron-ingnon, motubo kini nga usa ka tigpakaaron-ingnon. Kung kini usa ka tinuod nga Pulong sa Dios, himoon siya Niini og usa ka tinuod nga anak nga lalaki o babaye sa Dios, pinaagi sa Salaan sa usa ka tawo nga nagahunahuna. Sa dihang nagatubo na ang Binhi, nagaagi Kini Niana, Kini magapamunga og anak nga lalaki ug anak nga babaye sa Dios.

²¹⁴ Usa ka adlaw sa dihang ang kalibutan nahimutang pa kaniadto sa kangitngit sa kagubot, ang Dios. . . Karon paminaw pag-ayo, tungod kay moundang na kita sa pagpamulong. . .

pagkataudtaud. Matikdi. Usa ka adlaw sa dihang ang kalibutan anaa na usab sa tanan niining matang sa mga relihiyon, paghugas sa mga kamot, og mga kulon, pagsul-ob sa lain-laing mga sutana ug mga bonnet, ug uban pa, nahimutang kini taliwala sa grabe nga kagubot. Ang tinuod nga Israel sa Dios nahisalaag na gyud kaayo gikan sa mga balaod ug mga lagda sa Dios, ang ingon ni Jesus, “Kamo, tungod sa inyong mga kalagdaan nga gikabilinbilin, inyong gipakawalay-pulos ngadto sa mga tawo ang Pulong sa Dios, tungod sa inyong mga gikabilinbilin.” Ug gitan-aw silang balaan nga mga sacerdote, sama sa tawag nila sa ilaha; ug si Jesus miingon, “Iya kamo sa inyong amahan, nga mao ang yawa, ug ginabuhat ninyo ang iyang mga buhat.” Kita n’yo, mao gayud kana ang Iyang gisulti.

²¹⁵ Karon sa diha nga ang kalibutan anaa sa nianang matang sa kahimtang, ang Espiritu sa Dios milihok pag-usab ibabaw nianang Binhi nga gipili-nang-daan. Iyang gihimong realidad ug gituman ang Isaias 9:6 diha sa saad Niini; mao nga Siya, ang Dios, nahimong tawo, aron luwason kanang panahon sa kagubot. Sa dihang gibuhat ang tawo sa dagway sa Dios, ania ang ang Dios, pinaagi sa propeta nga makita kini daan . . . Karon hinumdumi ang Pulong, nakita-nang-daan sa propeta kini, ang mao rang propeta nga nakita na si Satanas sa niining katapusang mga adlaw, kita n’yo, sa niining programa pang-edukasyon ug ingon-anang mga butang nga aduna siya, programa pang-relihiyon. Ang mao ra nga propeta, sa Isaias 9:6, miingon, “Alang kanato ang usa ka Bata natawo, alang kanato ang usa ka Anak nga lalaki gihatag; ug ang Iyang Ngalan pagatawgon ‘Magtatambag, Prinsipe sa Pakigdait, Dios nga Makagagahum, Amahan nga walay Katapusan.’ Ug walay katapusan ang Iyang paghari.” Ug Pulong sa Dios kanang maong Pulong. Ug ang Espiritu milihok diha sa maong Pulong, ug Kini naporma diha sa tagoangkan sa usa ka ulay. Amen. “Natawo ang usa ka Anak nga lalaki,” dili gibuhat, “natawo.”

²¹⁶ Si Satanas misulay ug misulay pag-usab, nga espreyhan Kini. Gidala Siya ni Satanas didto ug miingon, “Kung Ikaw mao ang imong giingon nga Ikaw, kung ingon-ana buhata ang pipila niini nga pagpang-ayo dinhi alang kanako. Ipakita kanako kung unsaon Nimo kini paghimo. Himoa kining, tinapay, ug kining mga bato nga tinapay. Tan-awon daw nato kung moambak ba Ka, kay ang Kasulatan nagaingon man nga buhaton Nimo kini.”

²¹⁷ Makita ninyo sa karon silang mga relihiyosong yawa nga ingon niana sa gihapon ang ginasulti? “Kung aduna pa’y butang sama sa Balaanong pagpang-ayo; ania naghigda si Igsoong *Ingon niini-ug-ingon niana*, tan-awon daw namo kung maayo nimo siya.”

²¹⁸ Kanang mao ra gihapon nga yawa nagtindog didto sa krus ni Jesus, nga miingon, “Kung Ikaw ang Anak sa Dios, mokanaug Ka diha sa krus.”

219 Ang Pulong nag-ingon nga Siya mao ang Anak sa Dios. Gipamatud-an sa Espiritu nga Siya mao ang Anak sa Dios. Natuman gayud ang Isaias 9:6. Ug sa miaging gabii, daghan kaninyo diha sa sibya ang nakadungog kung giunsa namo pagsaysay kadtong sobra sa saysenta ka mga Kasulatan, halos, sa akong pagtoo, mahitungod sa pagpamatuod nga ang Kasulatan nag-ingon nga Siya gyud Kadto.

220 Oh, si Satanas misulay ug misulay pag-usab, ginabuhat niya ang tanan. Usa niana ka gabii, samtang nga nagahigda didto sa luyo sa sakayan, nakita niya si Jesus nga natulog. Ug siya miingon, “Laglagon ko Siya karon dayon.” Apan dili niya mabuhat.

221 Siya misulay sa pagtintal Kaniya sa pagbuhat og sayup nga butang, apan dili niya mabuhat kini. Ngano man? Tungod kay gi-espreyhan na Siya daan og pang-abog nga predestinasyon. Dili gyud sila malingla. Dili, dili. Ang Pulong miingon nga moanhi Siya. Amen. Walay yawa ang makasamok Kaniya, ug walay laing anak sa Dios, nga gipili-nang-daan ang makapuli sa Iyang lugar. Gi-espreyhan na Siya daan og pang-abog. Ang hilo ni Satanas, ang mga doktor sa denominasyon dili man lang makatandog Kaniya. Padayon ra Siya, walay bisan unsa ang makababag Kaniya, kita n’yo. Wala gyud kadto’y epekto Kaniya.

222 “Bueno, himoon ko Ikaw nga obispo sa tibuok yuta. Kay aduna man ko’y pagmando niini. Kung simbahon lang ko Nimo, umari Ka pag-apil sa akong grupo, ako—himoan ko Ikaw nga pangulo. Mokanaug ako, ug Ikaw akong ipuli.”

223 Ang sulti Niya, “Pahawa ka sa Akong atubangan, Satanas. Kay nahisulat, ‘Simbaha ang Dios, ang Pulong, ug Siya lang ang alagaron mo.’” Dayon usa niana ka adlaw . . .

Mahitungod niining halangdon nga Tawo, gusto kong magpabilin dinha sa kadali.

224 Apan usa niana ka adlaw, ang Espiritu naglihok pag-usab diha Kaniya; tungod kay adunay mga Pulong nga nahisulat mahitungod Kaniya, gikan sa Dios, pinaagi sa propeta, “Ug Siya gidala ngadto sa ihawan, sama sa nating karnero.” Ug ang Espiritu naglihok diha Kaniya, ug gipangunahan Siya, ug gihatud Siya didto sa krus sa Kalbaryo. Didto Siya namatay. Ug ang tanan nga gisulti mahitungod Kaniya sa Iyang pagkamatay, nangatuman gayud, aron maghatud og Kahayag ug Kinabuhi ngadto sa tanang predestinado nga Binhi sa Dios nga ania sa yuta. Naghatag Siya og paagi aron mahimo kini. *Ania* ang Binhi, ang Espiritu nagahatud og Kinabuhi; nga maoy nagabag-o sa mga anak nga lalake ug anak nga babaye sa Dios, gikan sa kalibutan niining mangitngit nga kagubot, ngadto sa pagkahimong mga anak sa Dios.

225 Ayaw kamo kapandol nianang pulong nga “predestinasyon.” Nasayod ko nga nagakapandol kamo. Apan, paminaw, dili Kini

akong pulong. Kondili usa Kini sa mga Pulong sa Dios. Kung gusto ninyong basahon kini, basaha ang Mga Taga-Efeso 1:5, nga, “Iya kitang gipili-nang-daan aron mahimong mga anak nga sinagop pinaagi kang Jesus Cristo.” Kita n’yo?

²²⁶ Tugoti nga himay-himayon ko kini sa makadiyut, sa, sa kadali lang, aron maiklaro kini sa inyong hunahuna. Tan-awa. Sama nga atua ka pa sa imong amahan, sa sinugdanan, usa pa lang ka semilya. Nasayod ba kamo niana, ang matag usa kaninyo? Didto na kamo kaniadto pa sa inyong kaapo-apo-apo-pohan sa tuhod, usab, nahibalo ba kamo niana?

²²⁷ Basaha ang Basahon sa Mga Hebreohanon, diin atong makita nga si Levi mihatag na’g ikapulo sa dihang didto pa siya sa bat-ang ni Abraham, upat pa ka kaliwatan adisir siya natawo. Sa diha nga si Abraham mihatag og ikapulo ngadto kang Melquisedec, kini giisip na ngadto sa iyang apo-apo-apo sa tuhod human kaniya, ug siya atua pa kaniadto sa mga bat-ang ni Abraham. Tan-awa. Kita n’yo?

²²⁸ Atua ka na kaniadto sa bat-ang sa imong amahan, apan ang imong amahan dili pa makapag-fellowship kanimo hangtud nga ikaw mamahimong usa na ka lawas nga unod.

²²⁹ Ang akong anak atua na kaniadto sa sulod nako. Ako—Ako—gusto ko’g usa ka anak nga lalaki, apan atua na siya kanako kaniadto pa. Kita n’yo? Atua na siya kanako kaniadto pa. Apan pinaagi sa kaminyoon, siya nahimong usa ka tawo nga sama kanako, ug dayon nahimo siyang sama kanako.

²³⁰ Ug kamo nahimo nga sama sa inyong mga ginikanan, kita n’yo, tungod kay anaa na kini kaninyo, sa sinugdanan pa lang. Karon kung kita mga anak sa Dios, ang Iyang mga kinaiyahan. . . Nga, ikaw usa ka kinaiyahan sa imong amahan, dili sa imong inahan; kondili sa imong amahan. Ang semilya man gud anaa sa amahan. Kita n’yo? Ug karon ang imong inahan usa ra ka incubator nga nagmabdos kanimo, nagdala sa binhi sa imong amahan. Kita n’yo?

²³¹ Ug ang yuta, sa pisikal, mao usab ang incubator nga nagadala sa binhi sa Dios. Kita n’yo, tukma gayud. Dili ang kalibutan, kung unsa ka daku ang kalibutan; kini’y kung unsa ka daku nga Dios ang nagbuhat niini. Kita n’yo? Kita n’yo?

²³² Karon kon ikaw anak nga lalaki ug anak nga babaye sa Dios, nan ikaw atua na sa Dios sa sinugdanan pa lang. Ikaw ang Iyang kinaiyahan. Kung wala ka didto kaniadto, nan wala gyud ka sa sinugdanan pa lang o dili gyud ka mamaatua didto.

²³³ Tungod kay, dili ko puedeng dalhon, dinhi sa akong mga bat-ang, ang anak nga lalaki niining tawhana *dinhi* o nianang tawhana *dinha*, kondili ang kaugalingon ko lang nga mga anak ang puede nakong dalhon, ug sila pud ang magadala sa akong dagway. Alleluyah. Nakita ba ninyo kini?

²³⁴ Ang mga anak nga lalaki ug babaye atua na sa Dios sa sinugdanan pa lang. Karon tan-awa. Aduna kamo'y Kinabuhing Walay Katapusan, ang ginasulti ninyo. Nagatoo kita niana, nga aduna kita'y Kinabuhing Walay Katapusan. Bueno, adunay usa lamang ka porma sa Kinabuhing Walay Katapusan, ug kana mao ang Dios. Mao lamang kana ang butang nga Eternal, ang Dios. Dayon kung aduna ka'y Kinabuhing Walay Katapusan, kanang Kinabuhi nga anaa kanimong atua na kaniadto daan, ug ikaw atua na daan sa mga bat-ang sa Dios bisan sa wala pa kaniadto nagkaaduna og kalibutan. Ug sa dihang ang Pulong Mismo . . . Si Jesus Mismo gitawag nga Pulong, ug diha sa San Juan 1, nag-ingon, "Sa sinugdan mao na ang Pulong, ug ang Pulong kauban sa Dios, ug ang Pulong mao ang Dios. Ug ang Pulong nahimong unod ug nagpuyo ipon kanato." Kung ingon-ana atua na ka daan sa mga bat-ang ni Jesus, ug miadto ka uban Kaniya sa Kalbaryo. Namatay ka uban Kaniya, ug nabanhaw pud ikaw uban Kaniya. Ug karon nagalingkod na kita sa Langitnong mga dapit diha Kaniya, napuno sa Iyang Espiritu, nga mga anak nga lalaki ug mga anak nga babaye sa Dios. Namatay uban Kaniya, ug nabanhaw uban Kaniya. Sigurado gyud.

²³⁵ Karon kung ingon-ana, karon, karon makapag-fellowship ka na Kaniya. Dili pa nimo mahimo kaniadto, tungod kay ikaw usa pa lang ka Pulong diha Kaniya, usa pa ka binhi. Apan karon ingon nga ikaw gihimo na Niyang tawo, ug karon gusto Niyang makipag-fellowship ka na Kaniya. Mao nga mikanaug Siya, nahimong unod aron hingpit Siya nga makapag-fellowship kanimong. Nakita n'yo ang hingpit nga pagpakig-fellowship? Oh, grabe, mga lalum kini nga mga misterio sa Dios! Pagkanindot gayud! Kita n'yo, ang Dios dili mahimong makig-fellowship diha sa Espiritu, busa nahimong tawo ang Dios uban kanato.

²³⁶ Si Jesus Cristo mao ang Dios Mismo, nga nadayag, tungod, Siya usa ka Anak tungod kay Siya gihimugso, apan usa lamang kadto ka tabernakulo nga Iyang puy-an. "Wala pa'y tawo nga nakakita sa Dios sukad kaniadto, kondili ang Bugtong Anak sa Amahan mao ang nagpaila Kaniya." Ang Dios nagbuhat og Iyang Kaugalingon nga balay, usa ka lawas nga kapuy-an, nanaug aron ikaw makahikap Kaniya. Unang Timoteo 3:16, "Sa walay langtugi, daku ang tinago sa pagka-diosnon; kay ang Dios gipadayag diha sa unod, nakit-an sa mga Manolunda, gitooan, gibayaw ngadto sa Langit." Kita n'yo? Karon Siya . . .

²³⁷ Ikaw ingon nga unod, ug Siya ingon nga unod, nan mahimo na kamong makipag-fellowship karon, tungod kay Siya mao ang kinaiyahan sa Dios sa gugma. Ang Dios gugma. Husto ba kana? Ug si Jesus mao ang kinaiyahan sa Dios sa gugma. Ug sa dihang naipasundayag ang kinaiyahan sa gugma, nga, mao Mismo ang Dios; ang tanang mga kinaiyahan nga nangapyut Kaniya, moduol Kaniya, "Ang tanan nga gihatag sa Amahan Kanako, moduol Kanako." Sigurado, kinahanglan nga sila gipili-nang-

daan. Kay kung dili, dili gyud ka maatua didto. Kana lang. Sigurado gyud.

²³⁸ Karon makapag-fellowship na kita, pinaagi sa—sa kadagaya sa Iyang Pulong, nga diin kabahin kamo. Kabahin ka sa Pulong; tungod kay Siya mao ang Pulong sa sinugdan, ug ikaw ang Pulong karon. Kita n'yo? Magawali ako unyang gabii, o sa Dominggo o usa sa niining mga adlaw pag-ania na ako, mahitungod sa kung unsa ang Pulong, kita n'yo. Ug karon kabahin kamo sa Pulong.

²³⁹ Paminaw mo. Adunay usa ka butang nga dili nako mahimo. Dili ko makapasigarbo sa akong mga katigulangan. Dili, tungod kay gikan ako sa usa ka grabeng kalamukat. Ang akong amahan usa ka Irish. Ang akong inahan usa ka lumad nga Indian, mistisang Indian; kay ang iyang inahan usa man ka Indian, maong nagadawat siya'g pension. Karon, silang tanan, mga palahubog, kadaghanan sa ila nangamatay nga sul-ob pa ang ilang mga sapatos, nangamatay sa pakig-away, pagpinusilay, ug ang uban pa. Wala gyud ko'y mapasigarbo bahin niana, tungod kay ang akong mga katigulangan ug ang akong kagikanan makalilisang.

²⁴⁰ Apan, igsoon, adunay usa ka butang nga akong ikapasigarbo, mahimo kong ikapasigarbo ang akong Ginoong Jesus Nga nagtubos kanako. Ug tungod sa Iyang gahum sa pagbag-o nagtanum og binhi, pinaagi sa predestinasyon, ug nakita ko Kini. Karon kang kinsa man kong anak? Oo. Mahimo kong ikapasigarbo Siya. Ug gigugol ko ang trayntay-tres ka tuig sa akong kinabuhi, nga ginapasigarbo Siya. Kung lugwayan pa Niya ako og dugang nga trayntay-tres ka tuig, maningkamot ko nga ipasigarbo pa gyud Siya. Kita n'yo? Makapasigarbo gayud ako sa akong Kagikanan, alleluyah, Siya nga mitubos kanako ug nagtanum sa binhi sa Kinabuhi sa sulod *dinhi*, ug gitugotan ako nga makita kini nga Pulong, gipadala ang Iyang Espiritu ug miingon, “Ania Kini. Isulti lang *kini*, ug kini mahitabo. Buhata *kana*.” Ug oh, grabe, mahimo kong ikapasigarbo Siya! Giunsa man Niya kini pagbuhat? Pinaagi sa paghugas sa tubig sa Pulong, ang tubig sa pagpahimulag. Nanghinaut ko nga maisaysay nato kini.

²⁴¹ Ang tinuod nga gipili-nang-daan nga mga magtotoo magapabilin gayud sa Pulong tungod kabahin man sila niana nga Pulong.

²⁴² Oh, mga nahisalaag nga mga bitoon, hangtud kanus-a ka maglatagaw? Kamong mga Methodist, Baptist, Presbyterian, mga anaa pa sa gawas, bisan unsa pa kamo, mga naglatagaw nga mga bitoon, nga magbalhin-balhin og iglesia, magbalhin-balhin og lugar, ug mabalhin-balhin og telebisyon, kalibutan sa kalibutan, nganong dili man kamo moanhi? Naghandum ang Dios og pagpakig-fellowship kanimo. Nangandoy Siya kanimo.

Gusto Niya kamo nga paga-usbon pinaagi sa pagbag-o sa inyong hunahuna, dili ngadto sa simbahan o ngadto sa denominasyon, kondili ngadto sa Iyang Pulong, nga, kamo usa ka kabahin niini kung kana nga tinguha anaa inyo.

Bulahan kadtong *gigutom* ug *giuhaw* sa *pagkamatarung: kay sila pagabusgon.* (Kita n'yo? Uh-huh.)

²⁴³ Ug gipadala Niya ang Iyang gahum sa pagbag-o, aron pagawason kamo gikan nianang pagkabaliko tungod sa relihiyon nga imong giapilan. Sa niining hilabihang pagkabaliko nga atong nahimutangan, ang Dios nagpadala sa Iyang gahum sa pagbag-o, ang Iyang Pulong, nga gipanghimatud-an, ug napamatud-an, aron pagawason ka nianang pagkawalay-hibangkaagan tungod sa relihiyosong pagkabaliko nga imong ginalakwan, “hubo, buta, makalolooy, ug wala masayod niini.” Palandunga n'yo kana, mga higala.

²⁴⁴ Kabalo mo, gipadala sa Dios ang Iyang gahum sa pagbag-o aron matuman ang Iyang Pulong, ug gibag-o ang tibuok lawas ni Sarah ug Abraham. Giusab ang maong tigulang nga lalaki ug tigulang nga babaye, tungod kay nagsaad Siya nga buhaton Niya kini.

²⁴⁵ Ug kung unsa ang gisaad sa Dios nga buhaton, Iya gayud kanang buhaton. Wala ni usa, bisan unsa man... Ang bisan unsang butang basta tinuis, walay bisan unsa man nga mahimo ang Dios niini. Apan magpabilin gayud Siya sa Iyang Pulong, ug Iyang ipadala ang Iyang Espiritu! “Ako nga Ginoo ang nagtanum Niini. Akong pagabisbisan Kini matag adlaw ug gabii, basin adunay moagaw kanila gikan sa Akong mga kamot.” Ang Biblia mismo ang nagasulti niana.

²⁴⁶ Oh, naglatagaw nga mga bitoon, kamong adunay tinguha sa inyong kasingkasing! Siguradong aduna gyud kamo niini, o wala kamo unta dinhi nagalingkod karong buntaga. Ug wala unta kamo nagsige'g tambong nianang mga simbahan ug mga awditoryum, ug ingon-anang mga butang nga inyong ginatambongan, kung asa man kini dapit sa tibuok nasud, kung walay Unsa man nga nagdala sa inyo didto. Adunay nagpakig-estorya sa inyo. Ayaw na pag-adto sa kung asa pa. Adunay usa ka paghugas sa tubig pinaagi sa Pulong, nga makapaputi sa inyo sama sa niebe. Oh, mga anak sa Dios, paminaw kamo! Ayaw pagpabilin diha nianang pagkabaliko. Panggula kamo gikan niana. Si Abraham mitoo sa Dios, ug gitawag ang bisan unsang butang nga sukwahi... .

²⁴⁷ Moingon ka, “Unsaon na lang nako pagpanginabuhi? Unsaon nako pagbuhat *niini*?” Obligasyon na kana sa Dios. “Unsaon man nako? Basin ipalagpot na ako sa akong mga kaubanan.”

248 Ang Dios miingon, “Siya nga mobiya sa iyang kaugalingong amahan, inahan, asawa, bana, mga panimalay, mga balay; pagahatagan Ko sila’g mga panimalay ug mga balay, hatagan Ko sila’g mga amahan ug inahan, ug mga igsoong lalaki ug mga igsoong babaye, niining kalibutana, ug Kinabuhing Walay Katapusan sa umalabot nga kalibutan.” Kini usa ka saad, higala. Kana, oh, kinahanglan kana nga mabisbisan! Ang matag saad sa Dios matuman gayud. Ang matag Binhi sa Dios usa ka saad.

249 Ug, igsoong babaye, hunonga na ang pagpaputol niana nga buhok, tungod kay kini dili-makapahimuut sa atubangan sa Dios. Hunonga na ang pagsul-ob sa ingon nianang mga sinuloban, usa kini ka dulumentanan alang Kaniya!

250 Kamong mga igsoong lalaki, kamong mga kalalaken-an, hunong na sa pagpakig-uyon nianang mga denominasyon, sa pagbuhat nianang mga butang, ug magtugot sa inyong mga asawa sa pagbuhat sa maong mga butang. Kini dili angay sa mga Cristohanon.

251 Mangbalik kamo sa Pulong! Atimana kana nga Pulong, magatubo Kini. Siguradong motubo Kini. Ang Gahum sa Dios sa pagbag-o nga maoy nagdala Niini sa sinugdanan, anaa na Siya sa Iyang dalan pabalik, nga ginahatud Kini balik pag-usab karon. Nagabalik na usab Siya sa nahimutangan niini kaniadto.

252 Si Enoch gilalin kaniadto, nga nakalikay gikan sa kamatayon, pinaagi sa gahum sa Dios sa pagbag-o. Unsay katuyoan nga gibuhat kadto sa Dios? Para ingon nga tipo sa umalabot nga Iglesia nga pagasakgawon. Oo. Mao si Elias.

253 Ang lawas ni Jesus nabuhi human kini namatay. Ug didto sa lubnganan, ang lawas ni Jesus gihatagan og kinabuhi pinaagi sa Pulong sa Dios; ug giusab, gikan sa usa ka patay, mabugnaw na nga lawas, ngadto sa gibanhaw, gihimaya nga Anak sa Dios. Tungod kay ang propeta, diha sa Mga Salmo 16:10, kung gusto ninyo kining isulat, 16:10, miingon, “Dili Ko pagabiyaan ang Iyang kalag sa sheol, ni tugotan Ko nga Ang Akong Balaan makakita sa pagkadunot.” Oh Dios!

254 Kana nga Pulong kinahanglan gayud nga matuman, kay Kini ang Pulong sa Dios! Itanum n’yo Kini sa inyong kasingkasing, kung gusto ninyo makauban sa Pagsakgaw. Kung gusto ninyo mamahimong tinuod nga mga Cristohanon, itanum kining Pulong. Sama sa gitooan ko nga si Ezekiel kadto, nga giingnan sa Dios, “Dawata kining basahon ug kan-a kini,” aron nga ang propeta ug ang Pulong mamahimong mao ra. Ug ang matag saad dinha kinahanglan nga maipadayag ang kaugalingon niini, tungod kay kini orihinal nga Binhi sa Dios. Ayaw gayud tugoti nga adunay edukadong teologo dinhi ang mosulay pagpasalikway ninyo Niini. Ayaw siya tugoti nga esprey niya kaninyo kanang karnal nga siyensiya ug kahibalo, ug edukasyon. Tohi lamang ang Dios!

255 Wala gidawat ni Abraham kaniadto ang siyentipikong mga pagtuki sa iyang panahon, nga moingon, “Tigulang na kaayo ko nga magkaaduna pa’y anak, hataas na kaayo akong edad. Gibuhat na nako ang *ingon niini*, *ingon niana*, o ang *uban pa*.” Apan gitawag niya ang bisan unsang butang nga sukwahi, ngadto sa Pulong sa Dios, nga daw dili kini ingon niana. Ug wala siya nagduhaduha sa saad sa Dios, pinaagi sa pagkawalay-pagtoo; kondili nagmalig-on, nga nagahatag og pagdayeg sa Dios. Nasayod siya nga may kasarang ang Dios nga tumanon kung unsa man Iyang gisaad.

256 Oh, naglatagaw nga mga anak nga lalaki, nga nangadaut tungod sa mga balagon nga ihalas niining kalibutana! Naglatagaw nga mga igsoong babaye, nga nangadani sa mga dapit ug mga uso niining kalibutan! Ug, minahal kong igsoong babaye, isipon mo man ako nga usa ka sapoton na nga tigulang, apan usa niining mga adlaw sa dihang matagbo nimo ang natagbo ni Florence Shakarian niadtong miaging gabii; naglingkod siya niining lawak, usab, niining dapita, sama sa imong nahibaloan. Kung pagmatagbo nimo kana, imong mahibaloan nga, dili ako, kondili kini nga Pulong husto gayud. Pahilayo nianang mga alutanan, nianang mga fashion shop. Likayi kanang mga butanga.

257 Moingon, “Nganong dili man nimo sila tudloan ug dagkung mga butang, kung unsaon nila nga mamahimong ingon *niini*?” Magsugod sá ta sa inyong ABC, unya moadto na dayon ta sa algebra. Kita n’yo? Magsugod sá sila sa pagkat-on og, “nga mao ang inyong katarunganon nga pagsimba.”

Busa ginapangamuyo ko kaninyo, mga igsoon, pinaagi sa mga kalooy sa Dios, nga inyong ihalad ang inyong lawas ingon nga halad nga buhi, balaan, ug nahamutan sa Dios, nga mao ang inyong katarunganon nga pagsimba.

258 Buhata lang ninyo “ang inyong katarunganon nga pagsimba,” ug ang Dios na ang moatiman sa uban pa niini; kita n’yo, kadtong mga butang lang nga makatarunganon nga inyong mabuhat sa inyong kaugalingon. Dili ba . . . Makatarunganon ba diay alang sa usa ka babaye nga huboan iyang kaugalingon, ug mogawas ug manglihok nga ingon niana, ingon nga ginakondena man kana sa Biblia? Makatarunganon ba diay alang sa usa ka tawo nga ihikot ang iyang kaugalingon sa ingon niana nga dogma sama sa aduna kita karon, ug sa tanan nianang mga butang dinhi, ug sa tanan nianang pang-seminaryong butang, ug mga ingon niana, kung kini klaro nga supak sa Pulong sa Dios? Kita n’yo?

259 Ang mga ngabil ni Isaias, siya usa lamang ka ordinaryo nga tawo nga mahugaw og mga ngabil. Ingon niya, “Ginoo, anaa ako sa taliwala sa mahugaw nga mga tawo, ug aduna ako’y

mahugaw nga mga ngabil. Pagkaalaut nako tungod kay nakita ko ang Dios.” Ug mikunsad ang usa ka Manolunda, gikuha ang Kalayo, ang Balaan nga Kalayo gikan sa halaran sa Dios, ug gibag-o ang mga ngabil ni Isaias; gikan sa mga ngabil nga iya sa usa ka tawong latagaw, ngadto sa mga ngabil nga iya sa usa ka propeta nga adunay MAO KINI ANG GINAINGON SA GINOO. Ang gahum sa Dios sa pagbag-o!

²⁶⁰ Usa ka gatus ug baynte ka mangingisda, ug—ug mga kabus ug dugay nang tigpamaligya og purpura, nga mga kababayenan, ug nanagtigum sila didto sa usa ka lawak sa itaas ug ilang gisaradohan ang mga pultahan, ang uban kanila wala gani og igong edukasyon aron isulat ang ilang kaugalingong mga ngalan. Gipangbag-o sila sa Dios gikan sa pagka-mangingisda og isda, ngadto sa pagka-mangingisda og tawo; gikan sa mga lalaki ug mga babaye sa kadalanan, ngadto sa mga balaan nga iya sa Dios, nga mga imortal na. Ang gahum sa Dios sa pagbag-o!

²⁶¹ Si Pablo, nga usa ka lokal nga miyembro sa iglesia, Presbyterian, Methodist, Baptist, Pentecostal, o unsa man; nagabiyahе siya didto sa dalan, nga may grabe ka masupilon nga espiritu, nga siya adunay kahibalo nga labaw pa kaysa sa bisan kinsa kanila. Namatuto siya kaniadto sa ilalum ni Gamaliel, ang usa sa pinakamaayo nga mga magtutudlo sa yuta kaniadto. Unsa ma’y nahitabo sa iyang pagpaingon didto sa Damascus, aron dakpon ang usa ka pundok sa mga tawo nga nagatoo sa Pulong sa Dios? Sa iyang dalan paingon didto, gihampak siya, ug aduna siya’y nadungog nga Mensahe. Ug gibag-o siya Niini gikan sa pagka-miyembro sa iglesia ug manimbahay; ngadto sa pagka-propeta sa Dios, nga misulat sa Pulong sa Dios, diha sa Bag-ong Tugon. Gikan sa pagka-usa ka miyembro sa iglesia ngadto sa usa ka balaan!

²⁶² Oh, mga naglatagaw nga bitoon, mohunong na kita. Naglatagaw nga mga anak, naglatagaw nga Binhi nga nagabalhin-balhin gikan sa usa ka dapit ngadto sa laing dapit, gikan nianang pagkabaliko; pangbalik kamo, karong buntaga, mga anak. Patalinghugi ninyo ako isip usa—isip usa ka tawong naningkamot sa pagbarog tali sa mga buhi ug sa mga patay.

²⁶³ Dinha sa mga lugar nga maabot niining sibya kung kamo nakakonekta pa, kamo nga nakatambong dinhing lugara, palihog pagpabilin usá sa paglingkod sa makadiyut lang. Nasayod ko nga gabii na gyud dinhi sa Tucson o, pasayloa ko, sa Phoenix diay, baynte minutos na lang aron mag-alas dose. Ug napapabilin ko kining mga tawo dinhi sa tibuok buntag. Ako ang hinungdan nga wala kamo nakatrabaho ug ingon-anang mga butang. Apan tan-awa, minahal nga higala, mahimong dugay na kaayo kamong napahilayo sa Dios. Pangbalik kamo karong buntaga. Mahimo ba? Aduna pa’y luna diha sa Tuburan.

In a manger long ago, I know it’s really so,

A Babe was born to save men from their sin.
 John saw Him on the shore, the Lamb for
 evermore,
 Oh, Christ, the Crucified of Calvary.
 Oh, I love that Man from Galilee, from Galilee,
 For He's done so very much for me.
 He's forgiven all my sins, placed the Holy Ghost
 within;
 Oh, I love, I love that Man from Galilee.
 A publican went to pray in the temple there one
 day,
 He cried, "O Lord, be merciful to me!"
 He was forgiven of every sin, and a deep peace
 placed within;
 He said, "Come see this Man from Galilee."
 (Husto.)

The lame was made to walk, the dumb was
 made to talk,
 That power was spoken with love upon the sea;
 The blind was made to see, I know it could only
 be
 The mercy of that Man from Galilee.

264 Itipo n'yo kana sa ministerio karon.

The woman at the well, He all her sins did tell,
 How five husbands she had at that time.
 She was forgiven of every sin, and a deep peace
 placed within;
 She cried, "Come see this Man from Galilee!"

265 Babaye, mahimo usab Niya ang ingon-ana. Nabasa niya ang
 imong kasingkasing karong buntaga. Lalaki, nabasa pud Niya
 ang imong kasingkasing. Oh, publikano, mag-ampo kita!

Oh, gihigugma ko kanang Tawo nga taga-
 Galilea, taga-Galilea,
 Kay daghan kaayo Siya'g nabuhat para nako.
 Iyang gipasaylo ang tanan nakong mga sala,
 gibutang ang Espiritu Santo sa sulod kanako;
 Oh, gihigugma ko, gihigugma ko kanang Tawo
 nga taga-Galilea.

266 Mahimo ba ninyong higugmaon Siya, uban kanako, karong
 buntaga? Oh, natipas, nahisalaag nga makasasala, dinhi o dinha
 sa gawas kung asa ka man, dawaton ba nimo ang akong Ginoo
 karong buntaga? Siya ang Pulong, ug ang Pulong gihatud na
 kanimo. Mahimo ba nimo siyang dawaton karong buntaga?
 Mahimo bang ipataas ninyo ang inyong mga kamot o motindog,
 o unsa man, ug mag-ampo, moingon, "Gusto kong dawaton
 Siya karon mismo. Igsoon, andam ako. Karon dayon gusto kong
 dawaton Siya." Mahimo bang motindog ka, kamong gusto nga

maampoan, ug moingon, “Ako’y . . .” maiampo, diay, “Ako usa ka makasasala. Gusto kong . . .” Panalanginan ka sa Dios, sir. Naa pa ba’y lain? Mag-ampo ang tanan karon, makadiyut lang.

Oh, sa maong pasungan sa dugay na nga panahon, (Nga anaa kini kaniadto sa kagubot, kabalo na mo, ang kalibutan kaniadto.) ug nahibalo ko nga kini tinuod gayud,

Usa ka gamay’ng Bata ang natawo aron sa pagluwas sa mga tawo gikan sa ilang mga sala.

Kaniadtong nakita Siya ni Juan didto sa baybayon, Siya mao kadtong Cordero hangtud sa kahangturan, (Siya ang Mao ra sa gihapon karon.)

Oh, Siya mao si Cristo, ang Gilansang sa Krus sa Kalbaryo.

²⁶⁷ Mahimo mo ba Siyang higugmaon karon sa tibuok mong kasingkasing, aron makahawa na ka sa kalibutanong kahimtang nga imong nahimutangan? Kamong mga babaye, kamong mga lalaki, oh, para man sa unsa diay nga kaganina pa kamo nagalingkod dinhi? Nagapakita kini nga aduna gyu’y usa ka butang sa sulod ninyo, aduna gyu’y usa ka butang dinha nga gigutom ug giuhaw. Wala unta kamo dinhi niining duha o tulo na ka oras, nga nagalingkod sulod niining bilding nga sama niini; aduna gyu’y usa ka butang. Mahimo bang patalinghugan ninyo kini karon? Himoa nga ang mga uso ug siyensiya, ug ang tanang mga butang sa kalibutan, mawala na sa inyong hunahuna karon, minahal kong igsoong lalaki o minahal kong igsoong babaye.

Ang mga iglesia nagakahiusa na, ang dagkung mga nasud nanagkabungkag na, ang Israel nahigmata na,

Ang maong mga timailhan nga gipanagna sa mga propeta;

Inihap na lang ang mga adlaw sa Gentil, uban ang kasamok nga nahiaguman;

“Balik, Oh kamong nagkatibulaag, ngadto sa inyong kaugalingon.”

Ang adlaw sa pagtubos haduol na,

Mga kasingkasing sa tawo nangakalusno sa kahadlok;

Magpakapuno sa Espiritu, pasigaha og maayo ang inyong suga,

Paghangad! Ang inyong pagtubos haduol na.

Mga mini nga propeta nanagpamakak, kamatuoran sa Dios ilang ginapanghimakak, Nga si Jesus ang Cristo mao ang atong Dios.

268 Bueno, tinuod kana. Nasayod kamo niana, kitang tanan, sa adlaw nga atong ginapuy-an. Pero nagsulti Siya:

Motungha ang Kahayag sa panahon sa kahaponon,
Ang dalan sa Himaya imo gayud mahikaplagan.

269 Kana mao ang adlaw nga atong ginapuy-an karon. Magadan-ag ang Kahayag diha sa kagabhion sa dihang paanha na ang kangitngit, pag-kilumkilom na, ang bitoon sa kagabhion.

Kilumkilom ug bitoon sa gabii,
Ug human niana ang kangitngit na!
Hinaut wala na'y kasubo sa panamilit,
Sa higayon nga ako molayag na;
Kay bisan molapas pa sa utlanan sa oras ug espasyo,
Ug anoron man ako sa baha palayo,
Ang akong Piloto ang gusto kong makita nawong sa nawong
Sa dihang matabok ko na ang maong utlanan.
Ayaw ko sultihi, diha sa masulub-on nga mga paagi,
Nga ang kinabuhi usa ra ka kawang nga damgo!
Ug ang kalag patay na nga nagakatulog,
Ug ang mga butang dili gyud mao sa kung daw sa unsa sila.

Oo, tinuod gayud ang kinabuhi! Ug ang kinabuhi malimbason!
Ug ang kamatayon dili man mao ang tumong niini;
Kay abog ka, ngadto sa abog pud ikaw magabalik,
Dili man ang kalag ang gihisgotan niini.
Ang kinabuhi sa mga halangdong tawo nagapahinumdom kanato
Ug arang natong himoong pagkahalangdon ang atong mga kinabuhi,
Ug, sa atong pagtaliwan, aduna kita'y mabilin,
Mga-agi-sa-tiil diha sa balas sa panahon;
Mga-agi-sa-tiil, nga mahimong ibilin alang sa uban,
Nga samtang nagalawig kita sa halalum nga kadagatan sa kinabuhi,
Usa man siya ka sinalikway ug nagakaunlod na nga igsoon,
Sa pagkakita niya niini, magmadasigon na usab.

Busa mamuhat kita, ug, magmaabtikon,
 Nga may kasingkasing nga andam sa bisan
 unsang pagkigbugno;
 Ayaw pahisama sa baka, nga amang ug
 kinahanglan pang itukmod!
 Magpakabayani ka diha sa pagpakigbugno!

²⁷⁰ Minahal nga Dios, Imoha sila. Nakita ko kining duha ka lalaki nga mitindog, Amahan. Nangamuyo ako, Dios, nga Imo silang pagadawaton karon. Gusto nilang mahimong Imong mga anak. Nahigmata na sila gikan sa pagkawalay-hibangkaagan sa ilang pagkinabuhi sa ilang kinabuhi, ug karon gusto nilang mausab, mabag-o, pinaagi sa pagbautismo sa Balaang Espiritu diha sa maong Binhi nga gitatum sa ilang mga kasingkasing niining adlaw. Eternal nga Dios, ang Magbubuhay sa tanang butang, Nga nagbuhay sa Imong Pulong, ug ako nagatoo nga Ikaw nahibalo na nga pagabuhaton kini niining mga tawhana karong buntaga. Nangamuyo ako, Ginoo, nga Imong pagabisbisanan kana nga Pulong, adlaw ug gabii, ug dili gayud pahanugotan si Satanas nga ilogon kini gikan sa Imong mga kamot. Hinaut nga mamahimo kining punoan, diha sa Paraiso sa Dios, pagnapahiuli na kini pag-usab, tungod kay dili mapakyas ang Imong Pulong, nga mobalik kini pag-usab. Kay kining kalibutana...

²⁷¹ Ug wala na'y ingon niini nga matang sa sibilisasyon sa umalabot nga kalibutan. Wala na'y mga salakyan o bisan unsa man nga binuhay sa siyensiya. Wala na'y ingon niini nga mga butang sa umalabot nga kalibutan. Apan kini mamahimong Kaugalingon nga matang mismo sa sibilisasyon nga iya sa Dios nga Iyang igapahimutang didto sa mahimayaong paghari. Kay, sa niining sibilisasyon karon adunay sakit, kamatayon, kasubanan, mga lubnganan, ug kawalad-on. Apan nianang umalabot nga Ginghamlan, walay kamatayon, walay kasubo, walay sakit, walay katigulangon. Oh Dios, mamahimong bag-o ang tanantan didto, sa Imong sibilisasyon.

²⁷² Dios, usba kami karon, pinaagi sa Imong gahum, pinaagi sa pagbag-o sa among hunahuna, aron bag-ohon kami gikan sa mahuyang nga mga elemento niining kalibutan karon, ngadto sa Pulong sa Dios. Ug hinaut nga kami mabag-o pinaagi sa gahum sa Dios diha sa Binhi nga ania sa among kasingkasing, nga kami nagatoo, aron mamahimong mga binuhay nga ginatawag og mga anak nga lalaki ug mga anak nga babaye sa Dios. Kini mao ang akong pag-ampo Kanim, Amahan, alang sa maong mga tawo, sa Ngalan ni Jesus. Amen.

²⁷³ Karon sa inyo nga anaa sa sibya, bisan asa ka man, gusto kong dawaton ninyo si Cristo, isip inyong personal nga Manluluwas, ug mapuno sa Iyang Espiritu. Ang mga Pulong nga gipamulong karong buntaga, hinaut nga motuhop ang mga Niini sa inyong kasingkasing. Ug hinaut nga dinha madawat

ninyo si Jesus. Ug tan-awa ang inyong kinabuhi, ug makita ninyo kung unsa na ang inyong pagkinabuhi. Ug dawata kining Salaan nga iya sa tawong nagahunahuna. Pagnakita ninyo ang inyong kaugalingon nga nagabuhat og usa ka butang nga supak niining Pulong, layuan n'yo kini, sa gilayon. Kita n'yo? Tungod kay, adunay usa ka Salaan nga magpahilayo sa kamatayon gikan kaninyo, kana mao ang Pulong sa Dios. Ang Iyang mga Pulong mao ang Kinabuhi, ug ipahilayo kamo Niini gikan sa kamatayon.

²⁷⁴ Kamong mga tawo dinhi karon nga ania sulod sa awditoryum, dugay-dugay ko kamong napapabilin dinhi. Nagapasalamat ako sa inyong pagtambong. Nangamuyo ako nga dili gayud pahanugotan sa Dios nga mamatay kini nga Binhi. Nagalaum ako nga wala kamo nagahunahuna nga nagatindog ako dinhi sa pagsulti niining mga butang aron lang nga malahi. Ginasulti ko kini tungod sa gugma; ug sa pagkasayod nga ako mortal, ingon nga ingon niana ako, ug mao ra kini ang higayon nga makahimo ako sa pagwali sa mga tawo. Ug gihigugma ko si Jesus Cristo. Siya ang akong Manluluwas. Ug hinumdumi, anaa pa unta ko dinha sa kadalanan kung dili pa tungod Kaniya. Anaa pa unta ko didto; kay ang akong mga ginikanan, ang tanan kong kaparyentihan, mga makasasala. Apan ang Dios, tungod sa Iyang gahum sa pag-usab, nasayod ko nga gihimo ako niini og laing binuhat. Ug ako—mahimo ko kining irekomendar sa inyo, nga maayo gayud. Ug pagapanalipdan ka niini sa mga panahon sa kasamok. Bisan ang kamatayon, anaa na sa pultahan, wala ka'y kahadlok. “Walay bisan unsa man ang makapahimulag kanato gikan sa gugma sa Dios, nga anaa kang Cristo.” Hinaut nga panalnginan sa Dios ang matag usa kaninyo, ug hatagan kamo og Kinabuhing Walay Katapusan.

²⁷⁵ Pila man dinhi ang walay Binhi sa Dios, ang bautismo sa Espiritu Santo? Ipataas lang ang inyong kamot, sa pag-ingon, “Hinumdumi ako, Igsoong Branham, nga akong madawat ang Balaang Espiritu.” Karon dawata n'yo kining Pulong diha sa inyong—sa inyong kasingkasing, ug toohi Kini. Karon kung inyong...Matan-aw n'yo ang inyong kaugalingon. Pag-adto ug pagtan-aw sa salamin, ug makita ninyo kung unsa inyong gikahimutangan. Kita n'yo, mahibaloan n'yo mismo.

²⁷⁶ Moingon ka, “Bueno, wala nako gipataas ang akong kamot, tungod kay nagtoo ko nga aduna na ako.”

²⁷⁷ Sige tan-awa ang imong kaugalingon sa salamin, dayon makita mo kung unsang klase nga espiritu ang nagalimbong kanimo, kita n'yo. Nalimbongan nga panghunahuna! “Adunay dalan nga daw matarung alang sa usa ka tawo, apan ang katapusan niini maoy mga dalan sa kamatayon.” Tinuod ba kana?

Down at the cross where my Saviour died,

Down there for cleansing from sin I cried;
 Oh, there to my heart was the Blood applied;
 Glory . . .

278 Ipiyong lang ang inyong mga mata, sa makadiyut lang karon, ug kantaha lang kana Kaniya. Atong ipataas ang atong mga kamot.

Glory to His Name! (Iyang bililhong Ngalan!)
 Glory to His Name!
 There to my heart was the Blood applied;
 Glory to His . . .

279 Gusto ko nga maglamanohay kamong mga Cristohanon sa usa'g usa, nga mga luwas na.

I am so wondrously saved from sin,
 Jesus so sweetly abides within,
 There at the cross where He took me in;
 Glory to His Name!
 Glory to His Name! (Bililhong Ngalan!)
 Glory to His Name!
 Oh, there to my heart was the Blood applied;
 Glory to His Name!

280 Ang Dugo adunay semilya sa Kinabuhi diha Niini, kabalo mo. Kini alang kanila nga wala pa makaila Kaniya:

Oh, come to this Fountain so rich and sweet;
 Cast thy poor soul at the Saviour's feet;
 Oh, plunge in today, and be made complete;
 Glory to His Name!
 Oh, glory to . . .

Iduko nato ang atong mga ulo karon samtang atong kantahon kini.

Glory to His Name!
 There to my heart was the Blood applied;
 Glory to His Name!

281 Gihigugma ba ninyo Siya? [Nagaingon ang kongregasyon, "Amen."—Ed.] Miingon si Pablo, "Magaawit ako sa Espiritu. Magasimba ako sa Espiritu." Atong kantahon kini sa hinay nga paagi pag-usab, samtang ginapataas nato ang atong mga kamot.

282 Kabalo mo, ang problema niini, kitang mga Pentecostal, nawala na ang atong kalipay, nawala na ang atong mga emosyon. Sama sa giingon ni Billy Graham sa miaging gabii, "Silang mga magwawali, nga adunay pinatikig nga mga kuwelyo, paingon sa Habagatan, nanagpalakpak sa ilang mga kamot, ug ginaduyog ang pagmartsa sa ilang mga tiil sa yuta, ug nagaundak, kay aduna sila'y butang nga ilang gikalipay." Bueno, oo, adunay ko'y Usa ka butang nga gikalipay ko. Kita n'yo? Kita n'yo? Oo. Oo, nawala na ang atong emosyon.

²⁸³ Karon ipataas lang nato ang atong mga kamot. Ayaw'g kabalaka nianang mga luha, kay dili kini makapasakit, kita n'yo. Dili gyud. "Siya nga nanagpugas, og mga luha, sa walay pagduhaduha nga magabalik siya, nga magadala og bililhong binangan nga ani." Sige.

Glory to His Name! (Bililhong Ngalan!)

Glory to His Name!

There to my heart was the Blood applied;

Glory to His Name!

Glory to His . . . (Oh Dios! Dayega ang Dios!)

Glory to His Name!

Itisuk gayud ang Binhi, Ginoo, sulod sa among kasingkasing!

. . . to my heart was the Blood applied;

Glory to His Name!



65-0911 Ang Gahum Sa Dios Sa Pag-usab
Ramada Inn
Phoenix, Arizona U.S.A.

CEBUANO

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org